

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

४२

दसवेआलियं-तइयं मूलसूत्तं

मुनि दीपरत्नसागर

Date : / / 2012

Jain Aagam Online Series-42

कमंको	अज्झयणं	उद्देसक	सुत्तं	गाहा	अणुककमो	पिट्ठंको
१	दुमपुप्फिया	-	-	१-५	१-५	२
२	सामन्नपुव्वयं	-	-	६-१६	६-१६	२
३	खुड्डियायारकहा	-	-	१७-३१	१७-३१	३
४	छज्जीवणिया	-	१-१५	३२-५९	३२-७५	४
५	पिंडेसणा	२	-	६०-२०९	७६-२२५	८
६	महायारकहा	-	-	२१०-२७७	२२६-२९३	१७
७	वक्कसुद्धि	-	-	२७८-३३४	२९४-३५०	२२
८	आयारपणिही	-	-	३३५-३९८	३५१-४१४	२५
९	विनयसमाहि	४	१६-२०	३९९-४६०	४१५-४८४	२९
१०	स-भिक्षु	-	-	४६१-४८१	४८५-५०५	३३
	चूलिया					
१	रइवक्का	-	२१-	४८२-४९९	५०६-५२४	३५
२	विवित्तचरिया	-	-	५००-५१५	५२५-५४०	३६

४२

दसवेआलियं-तइअं मूलसूत्तं

० पढमं अज्झयणं दुमपुप्फिया ०

- [१] धम्मो मंगलमुक्किद्वं अहिंसा संजमो तवो ।
देवा वि तं नमंसंति जस्स धम्मे सया मणो ॥
- [२] जहा दुमस्स पुप्फेसु भमरो आवियइ रसं ।
न य पुप्फं किलामेइ सो य पीणेइ अप्पयं ॥
- [३] एमेए समणा मुत्ता जे लोए संति साहुणो ।
विहंगमा व पुप्फेसु दाणभत्तेसणेरया ॥
- [४] वयं च वित्तिं लब्भामो न य कोइ उवहम्मइ ।
अहागडेसु रीयंते पुप्फेसु भमरा जहा ॥
- [५] महुगारसमा बुद्धा जे भवंति अणिस्सिया ।
नाणापिंडरया दंता तेण वुच्चंति साहुणो त्ति बेमि ॥

० पढमं अज्झयणं समत्तं ०

० बीअं अज्झयणं-सामण्णपुव्वयं ०

- [६] कहं नु कुज्जा सामण्णं जो कामे न निवारए ।
पए पए विसीयंतो संकप्पस्स वसं गओ ? ॥
- [७] वत्थगंधमलंकारं इत्थीओ सयणाणि य ।
अच्छंदा जे न भुंजंति न से चाइ त्ति वुच्चइ ॥
- [८] जे य कंते पिए भोए लद्धे वि पिट्ठि कुव्वइ ।
साहीणे चयइ भोए से हु चाइ त्ति वुच्चइ ॥
- [९] समाइ पेहाइ परिव्वयंतो सिया मणो निस्सरई बहिद्धा ।
न सा महं नोवि अहं पि तीसे इच्चेव ताओ विणइज्ज रागं ॥
- [१०] आयावयाही चय सोगमल्लं कामे कमाहि कमियं खु दुक्खं ।
छिंदाहि दोसं विणइज्ज रागं एवं सुही होहिसि संपराए ॥
- [११] पक्खंदे जलियं जोइं धूमकेउं दुरासयं ।
नेच्छंति वंतयं भोत्तुं कुले जाया अंगधणे ॥
- [१२] धिरत्थु तेऽजसोकामी जो तं जीवियकारणा ।

वतं इच्छसि आवेउं सेयं ते मरणं भवे ॥

[१३] अहं च भोगरायस्स तं चऽसि अंधगवण्हिणो ।

मा कुले गंधणा होमो संजमं निहुओ चर ॥

अज्झयणं-२, उद्देसो-

[१४] जइ तं काहिसि भावं जा जा दिच्छसि नारीओ ।

वायाविद्धु व्व हडो अट्ठिअप्पा भविस्ससि ॥

[१५] तीसे सो वयणं सोच्चा संजयाइ सुभासियं ।

अंकुसेण जहा नागो धम्मं संपडिवाइओ ॥

[१६] एवं करंति संबुद्धा पंडिया पवियक्खणा ।

विणियट्ठंति भोगेसु जहा से पुरिसुत्तमो - त्ति बेमि ॥

◦ बीअं अज्झयणं समत्तं ◦

◦ तइअं अज्झयणं खुड्डियायारकहा ◦

[१७] संजमे सुट्ठिअप्पाणं विप्पमुक्काण ताइणं ।

तेसिमेयमणाइण्णं निग्गंथाण महेसिणं ॥

[१८] उद्देसियं कीयगडं नियागमभिहडाणि य ।

राइभत्ते सिणाणे य गंधमल्ले य वीयणे ॥

[१९] संनिही गिहिमत्ते य रायपिंडे किमिच्छए ।

संवाहणा दंतपहोयणा य संपुच्छणा देहपलोयणा य ॥

[२०] अट्ठावए य नालीए छत्तस्स य धारणट्ठाए ।

तेगिच्छं पाहणा पाए समारंभं च जोइणो ॥

[२१] सेज्जायरपिंडं च आसंदी पलियंकए ।

गिहंतरनिसेज्जा य गायस्सुव्वट्ठणाणि य ॥

[२२] गिहिणो वेयावडियं जा य अजीववत्तिया ।

तत्तानिक्कुडभोइत्तं आउरस्सरणाणि य ॥

[२३] मूलए सिंगबेरे य उच्छुखंडे अनिक्कुडे ।

कंदे मूले य सच्चित्ते फले बीए य आमए ॥

[२४] सोवच्चले सिंधवे लोणे रोमालोणे य आमए ।

सामुद्धे पंसुखारे य कालालोणे य आमए ॥

[२५] धुवणेत्ति वमणे य वत्थीकम्मविरेयणे ।

अंजणे दंतवणे य गायब्भंगविभूसणे ॥

[२६] सव्वमेयमणाइन्नं निग्गंथाण महेसिणं ।

संजमंमि य जुत्ताणं लहुभूयविहारिणं

॥

[२७] पंचासवपरिण्णाया तिगुत्ता छसु संजया ।

पंचनिग्गहणा धीरा निग्गंथा उज्जुदंसिणो ॥

[२८] आयावयंति गिम्हेसु हेमंतेसु अवाउडा ।

वासासु पडिसंलीणा संजया सुसमाहिया ॥

[२९] परीसहरिउदंता धूयमोहा जिइंदिया ।

अज्झयणं-३, उद्देशो-

सव्वदुक्खप्पहीणद्वा पक्कमंति महेसिणो ॥

[३०] खवित्ता पुव्वकम्माइं संजमेण तवेण य ।

सिद्धिमग्गमनुपत्ता ताइणे परिनिव्वुडा, त्ति बेमि ॥

◦ तइयं अज्झयणं समत्तं ◦

◦ चउत्थं अज्झयणं छज्जीवणिया ◦

[३२] सुयं मे आउसं तेणं भगवया एवमक्खायं इह खलु छज्जीवणिया नामज्झयणं समणेणं भगवया महावीरेणं कासवेणं पवेइया सुअक्खाया सुपन्नत्ता सेयं मे अहिज्जितं अज्झयणं धम्मपन्नत्ती । कयरा खलु सा छज्जीवणिया नामज्झयणं समणेणं भगवया महावीरेणं कासवेणं पवेइया सुअक्खाया सुपन्नत्ता ? सेअं मे अहिज्जितं अज्झयणं धम्मपन्नत्ती ।

इमा खलु सा छज्जीवणिया नामज्झयणं समणेणं भगवया महावीरेणं कासवेणं पवेइया सुअक्खाया सुपन्नत्ता सेअं मे अहिज्जितं अज्झयणं धम्मपन्नत्ती, तं जहा- पुढविकाइया आउकाइया तेउकाइया वाउकाइया वणस्सइकाइया तसकाइया,

पुढवी चित्तमंतमक्खाया अनेगजीवा पुढोसत्ता अन्नत्थ सत्थपरिणएणं, आऊ चित्तमंत-मक्खाया अनेगजीवा पुढोसत्ता अन्नत्थ सत्थपरिणएणं, तेऊ चित्तमंतमक्खाया अनेगजीवा पुढोसत्ता अन्नत्थ सत्थपरिणएणं, वाऊ चित्तमंतमक्खाया अनेगजीवा पुढोसत्ता अन्नत्थ सत्थपरिणएणं, वणस्सई चित्तमंत-मक्खाया अनेगजीवा पुढोसत्ता अन्नत्थ सत्थपरिणएणं तं जहा-अग्गबीया, मूलबीया, पोरबीया, खंधबीया, बीयरूहा, समुच्छिमा, तणलया, वणस्सइकाइया सबीया चित्तमंतमक्खाया अनेगजीवा पुढोसत्ता, अन्नत्थ सत्थपरिणएणं ।

से जे पुण इमे अनेगे बहवे तसा पाणा तं जहा- अंडया, पोयया, जराउया, रसया, संसेइमा, संमुच्छिमा, उब्बिया उवावइया, जेसिं केसिं च पाणाणं अभिक्कंतं पडिक्कंतं, संकुचियं पसारियं, रूयं, भंतं, तसियं, पलाइयं, आगइगइविन्नाया, जे य कीडपयंगा जा य कुंथुपिपीलिया, सव्वे बेइंदिया, सव्वे तेइंदिया, सव्वे चउरिंदिया, सव्वे पंचिंदिया, सव्वे तिरिक्खजोणिया सव्वे नेरइया, सव्वे मणुया, सव्वे देवा, सव्वे पाणा, परमाहम्मिआ, एसो खलु छट्ठो जीवणिकाओ तसकाओ त्ति पवुच्चइ ।

[३३] इच्चेसिं छण्हं जीवणिकायाणं नेव सयं दंडं समारंभेज्जा नेवन्नेहिं दंडं समारंभावेज्जा, दंडं समारंभंते वि अन्ने न समणुजाणेज्जा, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरिहामि अप्पाणं वोसिरामि ।

[३४] पढमे भंते महव्वए, पाणाइवायाओ वेरमणं सव्वं भंते ! पाणाइवायं पच्चक्खामि से सुहुमं वा, बायरं वा, तसं वा, थावरं वा, नेव सयं पाणे अइवाएज्जा, नेवऽन्नेहिं पाणे अइवायावेज्जा, पाणे अइवायंतंऽवि अन्ने न समणुजाणामि, जावज्जीवाए तिविहं तिविहेणं मणेणं वायाए काएणं न करेमि न

कारवेमि करंतं पि अन्नं न समणुजाणामि, तस्स भंते! पडिक्कमामि निंदामि गरिहामि अप्पाणं वोसिरामि । पढमे भंते ! महव्वए उवट्ठिओमि सव्वाओ पाणाइवायाओ वेरमणं ।

[३५] अहावरे दोच्चे भंते! महव्वए मुसावायाओ वेरमणं, सव्वं भंते ! मुसावायं पच्च-
अज्झयणं-४, उद्देसो-

कखामि, से कोहा वा, लोहा वा, भया वा, हासा वा ; नेव सयं मुसं वएज्जा नेवऽन्नेहिं मुसं वायावेज्जा, मुसं वयंतं वि अन्ने न समणुजाणामि, जाज्जीवाए तिविहं तिविहेणं, मणेणं वायाए काएणं न करेमि न कारवेमि करंतं पि अन्नं न समणुजाणामि, तस्स भंते! पडिक्कमामि निंदामि गरिहामि अप्पाणं वोसिरामि । दोच्चे भंते महव्वए उवट्ठिओमि सव्वाओ मुसावायाओ वेरमणं ।

[३६] अहावरे तच्चे भंते ! महव्वए, अदिन्नादाणाओ वेरमणं, सव्वं भंते ! अदिन्नादाणं पच्चकखामि से गामे वा, नगरे वा, अरन्ने वा, अप्पं वा, बहुं वा, अणुं वा, थूलं वा चित्तमंतं वा, अचित्तमंतं वा, नेव सयं अदिन्नं गिण्हिज्जा, नेवऽन्नेहिं अदिन्नं गिण्हाविज्जा, अदिन्नं गिण्हंते वि अन्ने न समणुजाणामि, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरिहामि अप्पाणं वोसिरामि । तच्चे भंते ! महव्वए उवट्ठिओमि सव्वाओ अदिन्नादाणाओ वेरमणं ।

[३७] अहावरे चउत्थे भंते! महव्वए, मेहुणाओ वेरमणं, सव्वं भंते! मेहुणं पच्चकखामि, से दिव्वं वा, माणुसं वा, तिरिक्खजोणियं वा, नेव सयं मेहुणं सेविज्जा, नेवऽन्नेहिं मेहुणं सेवाविज्जा, मेहुणं सेवंते वि अन्ने न समणुजाणामि, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि, तस्स भंते! पडिक्कमामि निंदामि गरिहामि अप्पाणं वोसिरामि । चउत्थे भंते ! महव्वए उवट्ठिओ मि सव्वाओ मेहुणाओ वेरमणं ।

[३८] अहावरे पंचमे भंते! महव्वए, परिग्गहाओ वेरमणं, सव्वं भंते! परिग्गहं पच्चकखामि, से अप्पं वा, बहुं वा, अणुं वा थूलं वा चित्तमंतं वा अचित्तमंतं वा, नेव सयं परिग्गहं परिगिण्हिज्जा, नेवऽन्नेहिं परिग्गहं परिगिण्हाविज्जा, परिग्गहं परिगिण्हंते वि अन्ने न समणुजाणिज्जा, जावज्जीवाए, तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि, तस्स भंते! पडिक्कमामि निंदामि गरिहामि अप्पाणं वोसिरामि । पंचमे भंते ! महव्वए उवट्ठिओमि सव्वाओ परिग्गहाओ वेरमणं ।

[३९] अहावरे छट्ठे भंते! वए, राईभोयणाओ वेरमणं । सव्वं भंते ! राईभोयणं पच्चकखामि, से असणं वा, पाणं वा, खाइमं वा, साइमं वा, नेव सयं राइं भुंजिज्जा नेवऽन्नेहिं राइं भुंजाविज्जा, राइं भुंजंतेऽवि अन्ने न समणुजाणामि, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि, तस्स भंते! पडिक्कमामि निंदामि गरिहामि अप्पाणं वोसिरामि । छट्ठे भंते ! वए उवट्ठिओमि सव्वाओ राईभोयणाओ वेरमणं ।

[४०] इच्चेइयाइं पंच महव्वयाइं राईभोअणवेरमणछट्ठाइं अतहियट्ठियाए उवसंपज्जित्ता णं विहरामि ।

[४१] से भिक्खू वा भिक्खुणी वा संजयविरयपडिहयपच्चकखायपावकम्मे दिआ वा राओ वा एगओ वा परिसागओ वा सुत्ते वा जागरमाणे वा से पुढविं वा भित्ति वा सिलं वा लेलुं वा ससरक्खं वा कायं ससरक्खं वा वत्थं हत्थेण वा पाएण वा कट्ठेण वा किलिंचेण वा अंगुलियाए वा सिलागए वा

सिलागहत्थेण वा न आलिहेज्जा न विलिहेज्जा न घट्टेज्जा न भिंदेज्जा, अन्नं न आलिहावेज्जा न विलिहावेज्जा न घट्टावेज्जा न भिंदावेज्जा, अन्नं आलिहंतं वा विलिहंतं वा घट्टंतं वा भिंदंतं वा न समणुजाणिजा, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं अज्झयणं-४, उद्देसो-

न समणुजाणामि । तस्स भंते! पडिक्कमामि निंदामि गरिहामि अप्पाणं वोसिरामि ।

[४२] से भिक्खू वा भिक्खुणी वा संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सूत्ते वा, जागरमाणे वा, से उदगं वा, ओसं वा, हिमं वा, महियं वा करगं वा हरतणुगं वा सुद्धोदगं वा उदउल्लं वा कायं उदउल्लं वा वत्थं ससिणिद्धं वा कायं ससिणिद्धं वा वत्थं न आयुसिज्जा न संफुसिज्जा न आवीलिज्जा न पवीलिज्जा न अक्खोडेज्जा न पक्खोडज्जा, न आयावेज्जा, न पयावेज्जा, अन्नं न आमसावेज्जा, न संफुसावेज्जा, न आवीलावेज्जा, न पवीलावेज्जा, न अक्खोडावेज्जा, न पक्खोडावेज्जा, न आयावेज्जा, न पयावेज्जा, अन्नं आमसंतं वा, संफुसंतं वा, आवेलंतं वा, पवीलंतं वा, अक्खोडंतं वा, पक्खोडंतं वा, आयावंतं वा, पयावंतं वा न समणुजाणिज्जा, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि ।

[४३] से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से अगणिं वा इंगालं वा, मुम्मुरं वा, अच्चिं वा, जालं वा, अलायं वा, सुद्धागणिं वा, उककं वा ; न उंजेज्जा, न घट्टिज्जा, न भिंदेज्जा, न उज्जालेज्जा, न पज्जलेज्जा, न निव्वावेज्जा, अन्नं न उंज्जावेज्जा, न घट्टावेज्जा, न भिंदावेज्जा, न उज्जालावेज्जा, न पज्जालावेज्जा, न निव्वावेज्जा, अन्नं उंजंतं वा, घट्टंतं वा, भिंदंतं वा, उज्जालंतं वा, पज्जालंतं वा, निव्वावंतं वा, न समणुजाणिज्जा, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि ।

[४४] से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से सिएण वा, विहुयणेण वा, तालियंटेण वा, पत्तेण वा, पत्तभंगेण वा, साहाए वा, साहाभंगेण वा, पिहुणेण वा, पिहुणहत्थेण वा, चेलेण वा, चेलकन्नेण वा, हत्थेण वा, मुहेण वा, अप्पणो वा कायं, बाहिरं वा वि पुग्गलं न फुमेज्जा, न वीएज्जा, अन्नं न फुमावेज्जा, न वीआवेज्जा, अन्नं फुमंतं वा, वीअंतं वा न समणुजाणिज्जा, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि ।

[४५] से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से बीएसु वा, बीयपइठ्ठेसु वा, रुढेसु वा, रुढपइठ्ठेसु वा, जाएसु वा, जायपइठ्ठेसु वा, हरिएसु वा, हरियपइठ्ठेसु वा छिन्नेसु वा, छिन्नपइठ्ठेसु वा, सचित्तेसु वा, सचित्तकोलपडिनिस्सएसु वा, न गच्छेज्जा, न चिद्धेज्जा, न निसीइज्जा, न तुअट्टिज्जा, अन्नं न गच्छावेज्जा, न चिद्धावेज्जा, न निसीआवेज्जा ; न तुअट्टावेज्जा, अन्नं गच्छंतं वा, चिद्धंतं वा, निसीअंतं वा, तुयट्टंतं वा न समणुजाणामि, जावज्जीवाए तिविहं तिविहेणं मणेणं वायाए काएणं न करेमि

न कारवेमि करंतं पि अन्नं न समणुजाणामि ; तस्स भंते ! पडिक्कमामि निंदामि गरिहामि अप्पाणं वोसिरामि ।

[४६] से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ अज्झयणं-४, उद्देसो-

वा, एगओ वा, परिसागओ वा, सुत्ते वा, जागरमाणे वा, से कीडं वा, पयंगं वा, कुंथुं वा, पिपीलियं वा, हत्थंसि वा, पायंसि वा, बाहुंसि वा, उरुंसि वा, उदरंसि वा, सीसंसि वा, वत्थंसि वा, पडिग्गहंसि वा, कंबलंसि वा, पायपुंछणंसि वा, रयहरणंसि वा, गुच्छगंसि वा, उंडगंसि वा, दंडगंसि वा, पीढगंसि वा, फलगंसि वा, सेज्जंसि वा, संधारगंसि वा, अन्नयरंसि वा तहप्पगारे उवगरणजाए तओ संजयामेव पडिलेहिय पडेलिहिय पमज्जिय पमज्जिय एगंतमवणेज्जा, नो णं संघायमावज्जेज्जा ।

[४७] अजयं चरमाणो अ, पाणभूयाइं हिंसइ ।

बंधइपावयं कम्मं तं से होइ कडुयं फलं ॥

[४८] अजयं चिट्ठमाणो उ, पाणभूयाइं हिंसइ ।

बंधइ पावयं कम्मं तं से होइ कडुयं फलं ॥

[४९] अजयं आसमाणो उ, पाणभूयाइं हिंसइ ।

बंधइ पावयं कम्मं, तं से होइ कडुयं फलं ॥

[५०] अजयं सयमाणो उ, पाणभूयाइं हिंसइ ।

बंधइ पावयं कम्मं, तं से होइ कडुयं फलं ॥

[५१] अजयं भुंजमाणो उ, पाणभूयाइं हिंसइ ।

बंधइ पावयं कम्मं, तं से होइ कडुयं फलं ॥

[५२] अजयं भासमाणो उ, पाणभूयाइं हिंसइ ।

बंधइ पावयं कम्मं, तं से होइ कडुयं फलं ॥

[५३] कहं चरे कहं चिट्ठे, कहमासे कहं सए ।

कहं भुंजंतो, भासंतो, पावकम्मं न बंधइ ॥

[५४] जयं चरे जयं चिट्ठे, जयमासे जयं सए ।

जयं भुंजंतो, भासंतो, पावकम्मं न बंधइ ॥

[५५] सव्वभूयप्पभूयस्स, सम्मं भूयाइं पासओ ।

पिहिआसवस्स दंतस्स, पावकम्मं न बंधइ ॥

[५६] पढमं नाणं तओ दया, एवं चिट्ठइ सव्वसंजए ।

अन्नाणी किं काही, किंवा नाही छेयपावगं ? ॥

[५७] सोच्चा जाणइ कल्लाणं, सोच्चा जाणइ पावगं ।

उभयं पि जाणइ सोच्चा, जं सेयं तं समायरे ॥

[५८] जो जीवे वि न याणइ, अजीवे वि न याणइ ।

जीवाजीवे अयाणंतो, कहं सो नाहीइ संजमं ? ॥

[५९] जो जीवे वि वियाणेई, अजीवे वि वियाणइ ।

जीवाजीवे वियाणंतो, सो हु नाहीइ संजमं ॥

- [६०] जया जीवमजीवे य, दोऽवि एए वियाणई ।
 तया गइं बहुविहं, सव्वजीवाण जाणई ॥
- [६१] जया गइं बहुविहं, सव्वजीवाण जाणइ ।

अज्झयणं-४, उद्देशो-

- तया पुन्नं च पावं च, बंधं मुक्खं च जाणई ॥
- [६२] जया पुन्नं च पावं च, बंधं मुक्खं च जाणई ।
 तया निविंदए भोए, जे दिव्वे जे य माणुसे ॥
- [६३] जया निव्विंदए भोए, जे दिव्वे जे य माणुसे ।
 तया चयइ संजोगं, सब्भितरं सबाहिरं ॥
- [६४] जया चयइ संजोगं, सब्भितरं सबाहिरं ।
 तया मुंडे भवित्ताणं, पव्वइए अणगारियं ॥
- [६५] जया मुंडे भवित्ताणं, पव्वइए अणगारियं ।
 तया संवरमुक्किट्ठं, धम्मं फासे अनुत्तरं ॥
- [६६] जया संवरमुक्किट्ठं, धम्मं फासे अनुत्तरं ।
 तया धुणइ कम्मरयं, अबोहि कलुसं कडं ॥
- [६७] जया धुणइ कम्मरयं अबोहि कलुसं कडं ।
 तया सव्वत्तगं नाणं, देसणं चाभिगच्छई ॥
- [६८] जया सव्वत्तगं नाणं, दंसणं चाभिगच्छई ।
 तया लोगमलोगं च, जिणो जाणइ केवली ॥
- [६९] जया लोगमलोगं च, जिणो जाणइ केवली ।
 तया जोगे निरुंभित्ता, सेलेसिं पडिवज्जइ ॥
- [७०] जया जोगे निरुंभित्ता, सेलेसिं पडिवज्जइ ।
 तया कम्मं खवित्ताणं, सिद्धिं गच्छइ नीरओ ॥
- [७१] जया कम्मं खवित्ताणं, सिद्धिं गच्छइ नीरओ ।
 तया लोगमत्थयत्थो, सिद्धो हवइ सासओ ॥
- [७२] सुहसायगस्स समणस्स, सायाउलगस्स निगामसाइस्स ।
 उच्छोलणापहोइस्स, दुल्लहा सुगई तारिसगस्स ॥
- [७३] तवोगुणपहाणस्स, उज्जुमइ खंतिसंजमरयस्स ।
 परीसहे जिणंतस्स, सुलहा सुगई तारिसगस्स ॥
- [७४] पच्छा वि ते पयाया, खिप्पं गच्छंति अमरभवणाइं ।
 जेसिं पिओ तवो संजमो अ खंती अ बंभचेरं च ॥
- [७५] इच्चेयं छज्जीवणिअं, सम्मदिट्ठी सया जए ।
 दुल्लहं लहित्तुं सामन्नं, कम्मणा न विराहेज्जासि ॥ त्ति

बेमि

◦ चउत्थं अज्झयणं समत्तं ◦

० पंचमं अज्झयणं-पिंडेसणा ०

-: पढमो उद्देशो :-

[७६] संपत्ते भिक्खकालंमि, असंभंतो अमुच्छिओ ।
इमेण कम्मजोगेण, भत्तपानं गवेसए ॥

अज्झयणं-५, उद्देशो-१

- [७७] से गामे वा नगरे वा, गोयरग्गओ मुनी ।
चरे मंदमणुव्विगो, अव्वक्खित्तेण चेयसा ॥
- [७८] पुरओ जुगमायाए, पेहमाणो महिं चरे ।
वज्जंतो बीयहरियाइं, पाणे अ दगमट्ठिअं ॥
- [७९] ओवायं विसमं खाणु, विज्जलं परिवज्जए ।
संकमेण न गच्छेज्जा, विज्जमाणे परक्कमे ॥
- [८०] पवडंते व से तत्थ, पक्खलंते व संजए ।
हिंसेज्ज पाणभूयाइं, तसे अदुव थावरे ॥
- [८१] तम्हा तेण न गच्छेज्जा, संजए सुसमाहिए ।
सइ अन्नेण मग्गेण, जयमेव परक्कमे ॥
- [८२] इंगालं छारियं रासिं, तुसरासिं च गोयमं ।
ससरक्खेहिं पाएहिं, संजओ तं न सइक्कमे ॥
- [८३] न चरेज्ज वासे वासंते, महियाए व पडंतिए ।
महावाए व वायंते, तिरिच्छसंपाइमेसु वा ॥
- [८४] न चरेज्ज वेससामंते, बंभचेरवसाणुए ।
बंभयारिस्स दंतस्स, होज्जा तत्थ विसोत्तिआ ॥
- [८५] अनाययणे चरंतस्स, संसग्गीए अभिक्खणं ।
होज्ज वयाणं पीला, सामण्णंमि य संसओ ॥
- [८६] तम्हा एयं वियाणित्ता, दोसं दुग्गइवड्ढणं ।
वज्जए वेससामंतं, मुनी एगंतमस्सिए ॥
- [८७] साणं सूइअं गाविं, दित्तं गोणं हयं गयं ।
संडिब्भं कलहं जुद्धं, दूरओ परिवज्जए ॥
- [८८] अणुन्नए नावणए अप्पहिट्ठे अनाउले ।
इंदियाणि जहाभागं, दमइत्ता मुनी चरे ॥
- [८९] दवदवस्स न गच्छेज्जा, भासमाणो य गोअरे ।
हसंतो नाभिगच्छेज्जा, कुलं उच्चावयं सया ॥
- [९०] आलोयं थिग्गलं दारं, संधिंदगभवणाणि य ।
चरंतो न विनिज्झाए, संकट्ठाणं विवज्जए ॥
- [९१] रन्नो गिहवईणं च, रहस्सारक्खियाण य ।

संकिलेसकरं ठाणं, दूरओ परिवज्जए ॥

[९२] पडिकुट्ट कुलं न पविसे, मामगं परिवज्जए ।

अचियत्त कुलं न पविसे, चियत्तं पविसे कुलं ॥

[९३] साणीपावारपिहियं, अप्पणा नावपंगुरे ।

कवाडं नो पणोल्लिज्जा, उग्गहंसि अजाइआ ॥

अज्झयणं-५, उद्देसो-१

[९४] गोअरग्गपविट्ठो उ, वच्चमुत्तं न धारए ।

ओगासं फासुअं नच्चा, अणुन्नविय वोसिरे ॥

[९५] नीय दुवारं तमसं, कोट्ठगं परिवज्जए ।

अचक्खुविसओ जत्थ, पाणा दुप्पडिलेहगा ॥

[९६] जत्थ पुप्फाइं बीआइं, विप्पइण्णाइं कोट्ठए ।

अहुणोवलित्तं उल्लं दट्ठूणं परिवज्जए ॥

[९७] एलगं दारगं साणं, वच्छगं वा वि कोट्ठए ।

उल्लंघिया न पविसे विउहित्ताण व संजए ॥

[९८] असंसत्तं पलोएज्जा, नाइदूराऽवलोयए ।

उप्पुलं न विनिज्झाए, नियट्ठिज्ज अयंपिरो ॥

[९९] अइभूमिं न गच्छेज्जा, गोअरग्गगओ मुनी ।

कुलस्स भूमिं जाणित्ता, मियं भूमिं परक्कमे ॥

[१००] तत्थेव पडिलेहेज्जा भूमिफागं वियक्खणो ।

सिणाणस्स य वच्चस्स संलोगं परिवज्जए ॥

[१०१] दगमट्ठियआयाणे, बीयाणि हरियाणि अ ।

परिवज्जंतो चिट्ठेज्जा, सत्विंदिअ समाहिए ॥

[१०२] तत्थ से चिट्ठमाणस्स आहारे पानभोयणं ।

अकप्पिअं न गेण्हिज्जा, पडिगाहेज्ज कप्पिअं ॥

[१०३] आहारंती सिया तत्थ, परिसाडेज्ज भोयणं ।

दैतिअं पडिआइक्खे, न मे कप्पइ तारिसं ॥

[१०४] संमद्दमाणी पाणाणि, बीआणि, हरियाणि अ ।

असंजमकरिं नच्चा, तारिसिं परिवज्जए ॥

[१०५] साहट्ठु निक्खिवित्ताणं, सचित्तं घट्टियाणि य ।

तहेव समणट्ठाए, उदगं संपणोल्लिया ॥

[१०६] ओगाहइत्ता चलइत्ता, आहारे पानभोयणं ।

दैतियं पडियाइक्खे, न मे कप्पइ तारिसं ॥

[१०७] पुरेक्कमेण हत्थेण, दव्वीए भायणेण वा ।

दैतियं पडिआइक्खे, न मे कप्पइ तारिसं ॥

[१०८] एवं उदल्ले ससिणिद्धे, ससरक्खे मट्ठिआओसे ।

हरियाले हिंगुलए, मनोसिला अंजणे लोणे ॥

[१०९] गेरुअ वण्णिअ सेडिअ, सोरद्विय पिडुकुकुसकएय ।

उक्किट्टमसंसट्टे संसट्टे चेव बोद्धव्वे ॥

[११०] असंसट्टेण हत्थेणं, दव्वीए भायणेण वा ।

दिज्जमाणं न इच्छिज्जा, पच्छाकम्मं जहिं भवे ॥

अज्झयणं-५, उद्देशो-१

[१११] संसट्टेण हत्थेण, दव्वीए भायणेण वा ।

दिज्जमाणं पडिच्छिज्जा, जं तत्थेसणियं भवे ॥

[११२] दोणहं तु भुंजमाणाणं, एगो तत्थ निमंतए ।

दिज्जमाणं न इच्छेज्जा, छंदं से पडिलेहए ॥

[११३] दोणहं तु भुंजमाणाणं, दो वि तत्थ निमंतए ।

दिज्जमाणं पडिच्छिज्जा, जं तत्थेसणियं भवे ॥

[११४] गुव्विणीए उवण्णथं विविहं पानभोयणं ।

भुंजमाणं विवज्जेज्जा, भत्तसेसं पडिच्छए ॥

[११५] सिया य समणट्ठाए, गुव्विणी कालमासिणी ।

उट्ठिआ वा निसीएज्जा, निसन्ना वा पुणुट्ठए ॥

[११६] तं भवे भत्तपानं तु, संजयाण अकप्पिअं ।

दैतिअं पडिआइक्खे, न मे कप्पइ तारिसं ॥

[११७] थणगं पिज्जामाणी, दारगं वा कुमारिअं ।

तं निक्खिवित्तु रोअंतं, आहार पानभोयणं ॥

[११८] तं भवे भत्तपानं तु, संजयाणं अकप्पियं ।

दैतिअं पडियाइक्खे, न मे कप्पइ तारिसं ॥

[११९] जं भवे भत्तपानं तु, कप्पाकप्पंमि संकियं ।

दैतिअं पडिआइक्खे, न मे कप्पइ तारिसं ॥

[१२०] दगवारए पिहिअं, नीसाए पीढएण वा ।

लोढेण वा विलेवेण, सिलेसेण वि केणइ ॥

[१२१] तं च उब्भिंदिया देज्जा, समणट्ठाए व दावए ।

दैतिअं पडिआइक्खे, न मे कप्पइ तारिसं ॥

[१२२] असनं पानगं वाऽवि, खाइमं साइमं तहा ।

जं जाणेज्जा सुणेज्जा वा, दाणट्ठा पगडं इमे ॥

[१२३] तं भवे भत्तपानं तु, संजयाणं अकप्पियं ।

दैतिअं पडिआइक्खे, न मे कप्पइ तारिसं ॥

[१२४] असनं पानगं वाऽवि, खाइमं साइमं तहा ।

जं जाणेज्जा सुणेज्जा वा, पुण्णट्ठा पगडं इमं ॥

[१२५] तं भवे भत्तपानं तु, संजयाण अकप्पियं ।

दैतिअं पडिआइक्खे, न मे कप्पइ तारिसं ॥
[१२६] असनं पानगं वाऽवि, खाइमं साइमं तहा ।
जं जाणेज्जा सुणेज्जा वा, वणिमद्वा पगडं इमं ॥
[१२७] तं भवे भत्तपानं तु, संजयाण अकप्पिअं ।
दैतिअं पडिआइक्खे, न मे कप्पइ तारिसं ॥

अज्झयणं-५, उद्देसो-१

[१२८] असनं पानगं वाऽवि, खाइमं साइमं तहा ।
जं जाणेज्जा सुणेज्जा वा, समणद्वा पगडं इमं ॥
[१२९] तं भवे भत्तपानं तु संजयाण अकप्पिअं ।
दैतियं पडिआइक्खे, न मे कप्पइ तारिसं ॥
[१३०] उद्देसियं कीयगडं, पूइकम्मं च आहडं ।
अज्झोयर पामिच्चं, मीसजायं च विवज्जए ॥
[१३१] उग्गमं से अ पुच्छेज्जा, कस्सद्वा केण वा कडं ? ।
सोच्चा निस्संकिं सुद्धं, पडिगाहेज्ज, संजए ॥
[१३२] असनं पानगं वाऽवि, खाइमं साइमं तहा ।
पुप्फेसु होज्ज उम्मीसं, बीएसु हरिएसु वा ॥
[१३३] तं भवे भत्तपानं तु, संजयाण अकप्पिअं ।
दैतियं पडिआइक्खे न मे कप्पइ तारिसं ॥
[१३४] असनं पानगं वाऽवि, खाइमं साइमं तहा ।
उदगंमि होज्ज निक्खित्तं, उत्तिंगपणगेसु वा ॥
[१३५] तं भवे भत्तपानं तु, संजयाण अकप्पिअं ।
दैतिअं पडिआइक्खे, न मे कप्पइ तारिसं ॥
[१३६] असनं पानगं वाऽवि, खाइमं साइमं तहा ।
तेउंमि होज्ज निक्खित्तं, तं च संघट्टिया दए ॥
[१३७] तं भवे भत्तपानं तु, संजयाण अकप्पिअं ।
दैतिअं पडिआइक्खे, न मे कप्पइ तारिसं ॥
[१३८] एवं उस्सक्किया ओसक्किया, उज्जालिआ निव्वाविया ।
उस्सिंचिया निस्सिंचिया, ओवत्तिया ओवारिया दए ॥
[१३९] तं भवे भत्तपानं तु, संजयाण अकप्पिअं ।
दैतिअं पडिआइक्खे, न मे कप्पइ तारिसं ॥
[१४०] होज्ज कट्ठं सिलं वाऽवि, इट्ठालं वाऽवि एगया ।
ठविअं संकमद्वाए, तं च होज्ज चलाचलं ॥
[१४१] न तेन भिक्खू गच्छेज्जा, दिट्ठा तत्थ असंजमो ।
गंभीरं झुसिरं चेव, सत्त्विंदिअ समाहिए ॥
[१४२] निस्सेणिं फलगं पीढं, उस्सवित्ताणमारुहे ।

मचं कीलं च पासायं समणद्वाए एव दावए ॥
 [१४३] दुरुहमाणी पवडेज्जा, हत्थं पायं व लूसए ।
 पुढवीजीवे विहिंसेज्जा जे अ तन्निस्सिआ जगे ॥
 [१४४] एयारिसे महादोसे, जाणिऊण महेसिणो ।
 तम्हा मालोहडं भिक्खं, न पडिगिण्हंति संजया ॥

अज्झयणं-५, उद्देशो-१

[१४५] कंदं मूलं पलंबं वा, आमं छिन्नं च सन्निरं ।
 तुंबागं सिंगबेरं च, आमगं परिवज्जए ॥
 [१४६] तहेव सतुचुण्णाइं, कोलचुण्णाइं आवणे ।
 सक्कुलिं फाणिअं पूअं, अन्नं वा ऽवि तहाविहं ॥
 [१४७] विक्कायमाणं पसढं, रएणं परिफासियं ।
 देंतियं पडिआइक्खे, न मे कप्पइ तारिसं ॥
 [१४८] बहुअट्ठिअं पुग्गलं, अनिमिसं वा बहुकंटयं ।
 अत्थियं तिंदुयं बिल्लं, उच्छुखंडं वा सिंबलिं ॥
 [१४९] अप्पे सिया भोअणजाए बहुउज्झिय धम्मियं ।
 देंतिअं पडिआइक्खे, न मे कप्पइ तारिसं ॥
 [१५०] तहेवुच्चावयं पानं, अदुवा वारधोयणं ।
 संसेइमं चाउलोदगं, अहुणाधोयं विवज्जए ॥
 [१५१] जं जाणेज्ज चिराधोयं, मईए दंसणेण वा ।
 पडिपुच्छिऊण सोच्चा वा जं च निस्संकियं भवे ॥
 [१५२] अजीवं परिणयं नच्चा, पडिगाहेज्ज संजए ।
 अह संकियं भवेज्जा, आसाइत्ताण रोयए ॥
 [१५३] थोवमासायणद्वाए हत्थगंमि दलाहि मे ।
 मा मे अच्चंबिलं पुअं, नालं तिण्हं विणित्तए ॥
 [१५४] तं च अच्चंबिलं पूई, नालं तिण्हं विणितए ।
 देंतिअं पडिआइक्खे न मे कप्पइ तारिसं ॥
 [१५५] तं च होज्ज अकामेणं, विमणेणं पडिच्छियं ।
 तं अप्पणा न पिबे, नो वि अन्नस्स दावए ॥
 [१५६] एगंतमवक्कमित्ता अचितं पडिलेहिया ।
 जयं परिद्ववेज्जा, परिद्वप्प पडिक्कमे ॥
 [१५७] सिया अ गोअरग्गओ, इच्छिज्जा परिभोत्तुयं ।
 कुट्ठगं भित्तिमूलं वा, पडिलेहित्ताण फासुअं ॥
 [१५८] अणुन्नवेत्तु मेहावी, पडिच्छिन्नम्मि संवुडे ।
 हत्थगं संपमज्जित्ता, तत्थ भुंजिज्ज संजए ॥
 [१५९] तत्थ से भुंजमाणस्स अट्ठिअं कंटओ सिया ।

तणकट्टसक्करं वा ऽवि, अन्नं वा ऽवि तहाविहं ॥
 [१६०] तं उक्खिवित्तु न निक्खवे आसएण न छड्डए ।
 हत्थेणं तं गहेऊण एगंतमवक्कमे ॥
 [१६१] एगंतमवक्कमित्ता, अचितं पडिलेहिया ।
 जयं परिट्ठवेज्जा, परिट्ठप्प पडिक्कमे ॥

अज्झयणं-५, उद्देसो-१

[१६२] सिया अ भिक्खु इच्छेज्जा सिज्जमागम्म भोत्तुयं ।
 सपिंडपायमागम्म, उंडुयं पडिलेहिया ॥
 [१६३] विनएण पविसित्ता, सगासे गुरुणो मुनी ।
 इरियावहियमायाय, आगओ य पडिक्कमे ॥
 [१६४] आभोएत्ताण नीसेसं, अईआरं च जहक्कमं ।
 गमणागमणे चेव, भत्त पाने य संजए ॥
 [१६५] उज्जुप्पन्नो अणुव्विग्गो, अव्वक्खित्तेणं चेयसा ।
 आलोए गुरुसगासे, जं जहा गहियं भवे ॥
 [१६६] न सम्ममालोइयं हुज्जा, पुव्विं पच्छा व जं कडं ।
 पुणो पडिक्कमे तस्स, वोसडो चिंतए इमं ॥
 [१६७] अहो जिणेहिं असावज्जा, वित्ती साहूण देसिया ।
 मुक्खसाहणहेउस्स, साहु देहस्स धारणा ॥
 [१६८] नमुक्कारेण पारित्ता करेत्ता जिनसंथवं ।
 सज्झायं पट्टवित्ताणं, वीसमेज्ज खणं मुनी ॥
 [१६९] वीसमंतो इमं चिंते, हियमडुं लाभमस्सिओ ।
 जइ मे अणुग्गहं कुज्जा, साहु होज्जामि तारिओ ॥
 [१७०] साहवो तो चियत्तेणं, निमंतिज्ज जहक्कमं ।
 जइ तत्थ केइ इच्छेज्जा, तेहिं सद्धिं तु भुंजए ॥
 [१७१] अह कोइ न इच्छिज्जा, तओ भुंजिज्ज एक्कओ ।
 आलोए भायणे साहु, जयं अपरिसाडियं ॥
 [१७२] तित्तंगं च कडुयं च कसायं अंबिलं च महरुं लवणं वा ।
 एय लद्धमन्नत्थपउत्तं, महुघयं व भुंजेज्ज संजए ॥
 [१७३] अरसं विरसं वाऽवि, सूइयं वा असूइयं ।
 उल्लं वा जइ वा सुक्कं, मंथुकुम्मास भोयणं ॥
 [१७४] उप्पन्नं नाइहीलेज्जा, अप्पं वा बहु फासुयं ।
 मुहालद्धं मुहाजीवी, भुंजिज्जा दोसवज्जिअं ॥
 [१७५] दुल्लहाउ मुहादाई, मुहाजीवी वि दुल्लहा ।
 मुहादाई मुहाजीवी, दो वि गच्छइ सोग्गइं ॥ त्तिबेमि

० पंचमे अज्झयणे पढमो उद्देसो समत्तो ०

• बीओ-उद्देशो •

- [१७६] पडिग्गहं संलिहित्ताणं, लेवमायाए संजए ।
दुगंधं वा सुगंधं वा, सव्वं भुंजे न छड्डए ॥
[१७७] सेज्जा निसीहियाए, समावन्नो य गोअरे ।
अयावयद्वा भोच्चा णं, जइ तेणं न संथरे ॥

अज्झयणं-५, उद्देशो-२

- [१७८] तओ कारणसमुपन्ने, भत्तपानं गवेसए ।
विहिणा पुव्वउत्तेण, इमेणं उत्तरेण य ॥
[१७९] कालेणं निक्खमे भिक्खू, कालेण य पडिक्कमे ।
अकालं च विवज्जेत्ता, काले कालं समायरे ॥
[१८०] अकाले चरसि भिक्खू, कालं न पडिलेहसि ।
अप्पाणं च किलामेसि, सन्निवेसं च गरिहसि ॥
[१८१] सइ काले चरे भिक्खू, कुज्जा पुरिसकारिअं ।
अलाभोत्ति न सोएज्जा, तवो त्ति अहियासए ॥
[१८२] तहेवुच्चावया पाणा, भत्तद्वाए समागया ।
तं उज्जुयं न गच्छेज्जा जयमेव परक्कमे ॥
[१८३] गोयरग्गपविट्ठो उ न निसीएज्ज कत्थई ।
कहं च न पबंभेज्जा, चिद्धित्ताण व संजए ॥
[१८४] अग्गलं फलिहं दारं, कवाडं वाऽवि संजए ।
अवलंबिआ न चिद्धेज्जा, गोअरग्गगओ मुनी ॥
[१८५] समणं माहणं वाऽवि, किविणं वा वणीमगं ।
उवसंकमंतं भत्तद्वा, पाणद्वाए संजए ॥
[१८६] तं अइक्कमित्तु न पविसे, न चिद्धे चक्खुगोअरे ।
एगंतमवक्कमित्ता तत्थ चिद्धेज्ज संजए ॥
[१८७] वणीमगस्स वा तस्स, दायगस्सुभयस्स वा ।
अप्पत्तिअं सिया हुज्जा, लहुत्तं पवयणस्स वा ॥
[१८८] पडिसेहिए व दिन्ने वा, तओ तंमि नियत्तिए ।
उवसंकमिज्ज भत्तद्वा, पाणद्वाए व संजए ॥
[१८९] उप्पलं पउमं वा वि, कुमुअं वा मगदंतियं ।
अन्नं वा पुप्फ सचित्तं, तं च संलुंचिआ दए ॥
[१९०] तं भवे भत्तपानं तु, संजयाण अकप्पिअं ।
दैतिअं पडिआइक्खे, न मे कप्पइ तारिसं ॥
[१९१] उप्पलं पउमं वाऽवि, कुमुअं वा मगदंतियं ।
अन्नं वा पुप्फ सच्चित्तं, तं च सम्मदिया दए ॥

- [१९२] तं भवे भत्तपानं तु, संजयाण अकप्पियं ।
 दैतिअं पडिआइक्खे, न मे कप्पइ तारिसं ॥
- [१९३] सालुअं वा विरालियं, कुमुअं उप्पलनालियं ।
 मुणालिअं सासवनालिअं, उच्छुखंडं अनिव्वुडं ॥
- [१९४] तरुणगं वा पवालं, रूक्खस्स तणगस्स वा ।
 अन्नस्स वा वि हरिअस्स आमगं परिवज्जए ॥

अज्झयणं-५, उद्देशो-२

- [१९५] तरुणिअं वा छिवाडिं, आमिअं भज्जियं सयं ।
 दैतियं पडिआइक्खे, न मे कप्पइ तारिसं ॥
- [१९६] तहा कोलमणुस्सिन्नं, वेलुअं कासवनालिअं ।
 तिलपप्पडगं नीमं, आमगं परिवज्जए ॥
- [१९७] तहेव चाउलं पिढं, विअडं वा तत्तऽनिव्वुडं ।
 तिलपिढ पूइ पिन्नागं, आमगं परिवज्जए ॥
- [१९८] कविढं माउलिगं च, मूलगं मूलगत्तियं ।
 आमं असत्थपरिणयं, मनसा वि न पत्थए ॥
- [१९९] तहेव फलमंथूणि, बीअमंथूणि जाणिआ ।
 बिहेलगं पियालं च, आमगं परिवज्जए ॥
- [२००] समुयाणं चरे भिक्खू, कुलं उच्चावयं सया ।
 नीयं कुलमइक्कम्म, ऊसढं नाभिधारए ॥
- [२०१] अदीनो वित्तिमेसिज्जा, न विसीइज्ज पंडिए ।
 अमुच्छिओ भोअणंमि मायण्णे एसणारए ॥
- [२०२] बहुं परघरे अत्थि, विविहं खाइमसाइमं ।
 न तत्थ पंडिओ कुप्पे, इच्छा दिज्ज परो न वा ॥
- [२०३] सयणासण वत्थं वा, भत्तं पानं च संजए ।
 अदैतस्स न कुप्पिज्जा, पच्चक्खेविय अ दिसओ ॥
- [२०४] इत्थिअं पुरिसं वाऽवि, डहरं वा महल्लगं ।
 वंदमाणं न जाएज्जा, नो य णं फरुसं वए ॥
- [२०५] जे न वंदे न से कुप्पे, वंदिओ न समुक्कसे ।
 एवमन्ने समाणस्स, सामण्णमनुचिद्धई ॥
- [२०६] सिया एगइओ लद्धं, लोभेणं विनिगूहइ ।
 मा मेयं दाइयं संतं, ददूणं सयमायए ॥
- [२०७] अत्तइ गुरुओ लुद्धो, बहुं पावं पकुव्वइ ।
 दुत्तोसओ य से होइ, निव्वाणं च न गच्छइ ॥
- [२०८] सिया एगइओ लद्धं, विविहं पानभोयणं ।
 भद्दगं भद्दगं भोच्चा, विवन्नं विरसमाहरे ॥

- [२०९] जाणंतु ता इमे समणा, आययट्ठी अयं मुनी ।
 संतुडो सेवए पंतं, लूहवित्ती सुतोसओ ॥
- [२१०] पूयणट्ठा जसोकामी, मानसम्मानकामए ।
 बहं पसवइ पावं, मायासल्लं च कुव्वई ॥
- [२११] सुरं वा मेरगं वाऽवि, अन्नं वा मज्जगं रसं ।
 ससक्खं न पिबे भिक्खू, जसं सारक्खमप्पणो ॥

अज्झयणं-५, उद्देशो-२

- [२१२] पियए एगइओ तेणो, न मे कोई वियाणइ ।
 तस्स पस्सह दोसाइं, नियडिं च सुणेह मे ॥
- [२१३] वड्ढइ सुंडिआ तस्स, मायामोसं च भिक्खुणो ।
 अयसो य अनिव्वाणं, सययं च असाहुया ॥
- [२१४] निच्चुव्विग्गो जहा तेणो, अत्तकम्महि दुम्मई ।
 तारिसो मरणंते वि, न आराहेइ संवरं ॥
- [२१५] आयरिए नाराहेइ, समणे यावि तारिसो ।
 गिहत्था वि णं गरिहंति जेण जाणंति तारिसं ॥
- [२१६] एवं तु अगुणप्पेही, गुणाणं च विवज्जओ ।
 तारिसो मरणंते वि, न आराहेइ संवरं ॥
- [२१७] तवं कुव्वइ मेहावी, पणीयं वज्जए रसं ।
 मज्जप्पमायविरओ, तवस्सी अइउक्कसो ॥
- [२१८] तस्स पस्सह कल्लाणं, अनेगसाहुपूइअं ।
 विउलं अत्थसंजुत्तं, कित्तइस्सं सुणेह मे ॥
- [२१९] एवं तु सगुणप्पेही, अगुणाणं च विवज्जए ।
 तारिसो मरणंते वि, आराहेइ संवरं ॥
- [२२०] आयरिए आराहेइ, समणे यावि तारिसो ।
 गिहत्था वि न पूयंति, जेण जाणंति तारिसं ॥
- [२२१] तवतेणे वयतेणे, रूवतेणे य जे नरे ।
 आयारभावतेणे य कुव्वइ देवकिब्बिसं ॥
- [२२२] लद्धूण वि देवत्तं, उववन्नो देवकिब्बिसे ।
 तत्थावि से न याणाइ, किं मे किच्चा इमं फलं ॥
- [२२३] तत्तो वि से चइत्ताणं, लब्धिही एलमूययं ।
 नरयं तिरिक्खजोणिं वा, बोही जत्थ सुदुल्लहा ॥
- [२२४] एयं च दोसं दद्धूणं, नायपुत्तेणं भासिअं ।
 अणुमायं पि मेहावी, मायामोसं विवज्जए ॥
- [२२५] सिक्खिऊण भिक्खेसणसोहिं, संजयाण बुद्धाण सगासे ।

तत्थ मिक्खू सुप्पणिहिंदिए, तिक्वलज्ज गुणवं विहरिज्जासि ॥
त्तिबेमि

◦ पंचमे अज्झयणे बीओ उद्देसो समत्तो ◦

पंचमं अज्झयणं समत्तं ◦

◦ छट्ठं अज्झयणं-महायारकहा ◦

[२२६] नाणदंसणसंपन्नं, संजमे अ तवे रयं ।

गणिमागमसंपन्नं, उज्जाणंमि समोसढं ॥

अज्झयणं-६, उद्देसो-

[२२७] रायाणो रायमच्चा य, माहणा अदुव खत्तिया ।

पुच्छंति निहुअप्पाणो, कहं भे आयारगोयरो ? ॥

[२२८] तेसिं सो निहुओ दंतो, सव्वभूयसुहावहो ।

सिक्खाए सुसमाउत्तो, आयक्खइ वियक्खणो ॥

[२२९] हंदि धम्मत्थकामाणं, निग्गंथाणं सुणेह मे ।

आयारगोयरं भीमं, सयलं दुरहिद्वियं ॥

[२३०] नन्नत्थ एरिसं वुत्तं, जं लीए परमदुच्चरं ।

विउलद्वाणभाइस्स न भूयं न भविस्सइ ॥

[२३१] सखुड्ढगवियत्ताणं, वाहियाणं च जे गुणा ।

अखंडफुडिया कायव्वा, तं सुणेह जहा तहा ॥

[२३२] दस अट्ठ य ठाणाइं, जाइं बालोऽवरज्झइ ।

तत्थ अन्नयरे ठाणे, निग्गंथत्ताओ भस्सई ॥

[२३३] तत्थिमं पढमं ठाणं, महावीरेण देसिअं ।

अहिंसा निउणा दिट्ठा, सव्व भूएसु संजमो ॥

[२३४] जावंति लोए पाणा, तसा अदुव थावरा ।

ते जाणमजाणं वा, न हणे नो वि घायए ॥

[२३५] सव्वे जीवा वि इच्छंति, जीविउं न मरिज्जिउं ।

तम्हा पाणवहं घोरं, निग्गंथा वज्जयंति णं ॥

[२३६] अप्पणद्वा परद्वा वा, कोहा वा जइ वा भया ।

हिंसगं न मुसं बूया, नोवि अन्नं वयावए ॥

[२३७] मुसावाओ य लोगंमि, सव्वसाहूहिं गरिहिओ ।

अविस्सासो य भूयाणं, तम्हा मोसं विवज्जए ॥

[२३८] चित्तमंतमचित्तं वा, अप्पं वा जइ वा बहुं ।

दंतसोहणमेत्तं पि, उग्गहंसि अजाइया ॥

[२३९] तं अप्पणा न गेण्हंति, नोऽवि गेण्हावए परं ।

अन्नं वा गिण्हमाणं पि, नाणुजाणंति संजया ॥

- [२४०] अबंभचरिअं घोरं, पमायं दुरहिद्वियं ।
 नायरंति मुनी लोए, भेयाययणवज्जिणो ॥
- [२४१] मूलमेयमहम्मस्स, महादोससमुस्सयं ।
 तम्हा मेहुणसंसग्गिं, निग्गंथा वज्जयंति णं ॥
- [२४२] बिडमुब्भेइमं लोणं, तेल्लं सप्पिं च फाणियं ।
 न ते सन्निहिमिच्छंति, नायपुत्तवओरया ॥
- [२४३] लोहस्सेसो अणुफासे, मन्ने अन्नयरामवि ।
 जे सिया सन्निहि कामे, गिही पव्वइए न से ॥

अज्झयणं-६, उद्देसो-

- [२४४] जं पि वत्थं च पायं वा, कंबले पायपुंछणं ।
 तं पि संजमलज्जद्वा, धारंति परिहरंति य ॥
- [२४५] न सो परिग्गहो, वुत्तो, नायपुत्तेण ताइणा ।
 मुच्छा परिग्गहो वुत्तो, इइ वुत्तं महेसिणा ॥
- [२४६] सव्वत्थुवहिणा बुद्धा, संरक्खणपरिग्गहे ।
 अवि अप्पणो ऽवि देहंमि, नायरंति ममाइयं ॥
- [२४७] अहो निच्चं तवो कम्मं, सव्वबुद्धेहिं वण्णियं ।
 जा य लज्जासमा वित्ती एगभत्तं च भोयणं ॥
- [२४८] संति मे सुहुमा पाणा, तसा अदुव थावरा ।
 जाइं राओ अपासंतो, कहमेसणियं चरे ? ॥
- [२४९] उदउल्लं बीयसंसत्तं, पाणा निवडिया महिं ।
 दिया ताइं विवज्जिजा, राओ तत्थ कहं चरे ? ॥
- [२५०] एयं च दोसं दडूणं, नायपुत्तेण भासियं ।
 सव्वाहारं न भुंजंति, निग्गंथा राइभोयणं ॥
- [२५१] पुढविकायं न हिंसंति, मनसा वायसा कायसा ।
 तिविहेण करणजोएण, संजया सुसमाहिया ॥
- [२५२] पुढविकायं विहिसंतो, हिंसई उ तयस्सिए ।
 तसे य विविहे पाणे, चक्खुसे य अचक्खुसे ॥
- [२५३] तम्हा एयं विआणित्ता, दोसं दुग्गइवड्ढणं ।
 पुढविकायसमारंभं, जावज्जीवाए वज्जए ॥
- [२५४] आउकायं न हिंसंति, मनसा वायसा कायसा ।
 तिविहेण करणजोएण, संजया सुसमाहिया ॥
- [२५५] आउकायं विहिसंतो, हिंसई उ तयस्सिए ।
 तसे अ विविहे पाणे, चक्खुसे य अचक्खुसे ॥
- [२५६] तम्हा एयं विआणित्ता, दोसं दुग्गइवड्ढणं ।
 आउकायसमारंभं, जावज्जीवाए वज्जए ॥

- [२५७] जायतेयं न इच्छंति, पावगं जलइत्तए ।
 तिक्खमन्नयरं सत्थं, सव्वओ वि दुरासयं ॥
- [२५८] पाईणं पडिणं वाऽवि, उड्ढं अणुदिसामवि ।
 अहे दाहिणओ वा ऽवि, दहे उत्तरओ वि अ ॥
- [२५९] भूयाणमेसमाघाओ, हव्ववाहो न संसओ ।
 तं पईवपयावद्धा, संजया किंचि नारभे ॥
- [२६०] तम्हा एयं वियाणित्ता, दोसं दुग्गइवड्ढणं ।
 तेउकायसमारंभं, जावज्जीवाए वज्जए ॥

अज्झयणं-६, उद्देशो-

- [२६१] अनिलस्स समारंभं, बुद्धा मन्नंति तारिसं ।
 सावज्जबहुलं चेयं, नेयं ताईहिं सेवियं ॥
- [२६२] तालिअंटेण पत्तेण, साहाविहुयणेण वा ।
 न ते वीडुमिच्छंति, वीयावेऊण वा परं ॥
- [२६३] जं पि वत्थं व पायं वा, कंबलं पायपुंछणं ।
 न ते वायमुईरंति, जयं परिहरंति य ॥
- [२६४] तम्हा एयं विआणित्ता दोसं दुग्गइवड्ढणं ।
 वाउकायसमारंभं, जावज्जीवाए वज्जए ॥
- [२६५] वणस्सइं न हिंसंति, मनसा वयसा कायसा ।
 तिविहेण करणजोएण, संजया सुसमहिआ ॥
- [२६६] वणस्सइं विहिसंतो, हिंसइ उ तयस्सिए ।
 तसे य विविहे पाणे, चक्खुसे य अचक्खुसे ॥
- [२६७] तम्हा एयं वियाणित्ता, दोसं दुग्गइवड्ढणं ।
 वणस्सइसमारंभं, जावज्जीवाए वज्जए ॥
- [२६८] तसकायं न हिंसंति, मनसा वयसा कायसा ।
 तिविहेण करणजोएण, संजया सुसमाहिया ॥
- [२६९] तसकायं विहिसंतो, हिंसइ उ तयस्सिए ।
 तसे य विविहे पाणे, चक्खुसे य अचक्खुसे ॥
- [२७०] तम्हा एयं वियाणित्ता, दोसं दुग्गइवड्ढणं ।
 तसकायसमारंभं, जावज्जीवाए वज्जए ॥
- [२७१] जाइं चत्तारि भुंज्जाइं, इसिणाऽऽहारमाइणि ।
 ताइं तु विवज्जंतो, संजमं अनुपालए ॥
- [२७२] पिंडं सेज्जं च वत्थं च, चउत्थं पायमेव य ।
 अक्कपियं न इच्छेज्जा, पडिगाहेज्ज कप्पियं ॥
- [२७३] जे नियागं ममायंति, कीयमुद्देसिआऽऽहडं ।
 वहं ते समणुजाणंति, इइ वुत्तं महेसिणा ॥

- [२७४] तम्हा असनपानाइं, कीयमुद्देसियाहडं ।
 वज्जंयति ठियप्पाणो, निग्गंथा धम्मजीविणो ॥
- [२७५] कंसेसु कंसपाएसु, कुंडमोएसु वा पुणो ।
 भुंजंतो असनपानाइं, आयारा परिभस्सइ ॥
- [२७६] सीओदगसमारंभे, मत्तधोयणछड्डणे ।
 जाइं छनंति भूयाइं, दिट्ठो तत्थ असंजमो ॥
- [२७७] पच्छाकम्मं पुरेकम्मं, सिया तत्थ न कप्पइ ।
 एयमड्डं न भुंजंति, निग्गंथा गिहिभायणे ॥

अज्झयणं-६, उद्देसो-

- [२७८] आसंदी पलियंकेसु, मंचामालालएसु वा ।
 अनायरियमज्जाणं, आसइत्तु सइत्तु वा ॥
- [२७९] नासंदीपलियंकेसु, न निसेज्जा न पीढए ।
 निग्गंथा ऽपडिलेहाए, बुद्धवुत्तमहिट्ठगा ॥
- [२८०] गंभीरविजया एए, पाणा दुप्पडिलेहगा ।
 आसंदी पलियंको य, एयमड्डं विवज्जिया ॥
- [२८१] गोअरग्गपविट्ठस्स, निसेज्जा जस्स कप्पइ ।
 इमेरिसमणायारं, आवज्जइ अबोहियं ॥
- [२८२] विवत्ती बंभचेरस्स, पाणाणं च वहे वहो ।
 वणीमगपडिग्घाओ, पडिकोहो अगारिणं ॥
- [२८३] अगुत्ती बंभचेरस्स, इत्थीओ वाऽवि संकणं ।
 कुसीलवड्डणं ठाणं, दूरओ परिवज्जए ॥
- [२८४] तिण्हमन्नयरागस्स, निसिज्जा जस्स कप्पई ।
 जराए अभिभूअस्स, वाहियस्स तवस्सिणो ॥
- [२८५] वाहिओ वा अरोगी वा, सिणाणं जो उ पत्थए ।
 वुक्कंतो होइ आयारो, जढो हवइ संजमो ॥
- [२८६] संतिमे सुहुमा पाणा, घसासु भिलगासु य ।
 जे अ भिक्खू सिणायंतो, विअडेणुप्पिलावए ॥
- [२८७] तम्हा ते न सिणायंति, सीएण उसिणेण वा ।
 जावज्जीवं वयं घोरं, असिणाणमहिट्ठगा ॥
- [२८८] सिणाणं अदुवा कक्कं, लुद्धं पउमगाणि अ ।
 गायस्सुव्वट्ठण्ढाए, नायरंति कयाइ वि ॥
- [२८९] नगिणस्स वाऽवि मुंडस्स, दीहरोमनहंसिणो ।
 मेहुणा उवसंतस्स, किं विभूसाए कारियं ? ॥
- [२९०] विभूसावत्तिअं भिक्खू, कम्मं बंधइ चिक्कणं ।
 संसारसायरे घोरे, जेणं पडइ दुरुत्तरे ॥

- [२९१] विभूसावत्तियं चेयं, बुद्धा मन्नन्ति तारिसं ।
 सावज्ज बहुलं चेयं, नेयं ताईहिं सेवियं ॥
- [२९२] खवेंति अप्पाणमोहदंसिणो तवे रया संजम अज्जवे गुणे ।
 धुणंति पावाइं पुरेकडाइं, नवाइं पावाइं न ते करेंति ॥
- [२९३] सओवसंता अममा अकिंचणा, सविज्जविज्जाणुगया जसंसिणो ।
 उउप्पसन्ने विमले व चंदिमा,सिद्धिं विमाणाइं उवेंति ताइणो ॥ त्ति बेमि

• छट्ठं अज्झयणं समत्तं •

अज्झयणं-७, उद्देशो-

• सत्तमं अज्झयणं वक्कसुद्धि •

- [२९४] चउण्हं खलु भासाणं, परिसंखाय पन्नवं ।
 दुण्हं तु विनयं सिक्खे दो न भासेज्ज सव्वसो ॥
- [२९५] जा य सच्चा अवत्तव्वा, सच्चामीसा य जा मुसा ।
 जा य बुद्धेहिं नाइन्ना, न तं भासिज्ज पन्नवं ॥
- [२९६] असच्चमोसं सच्चं च, अणवज्जमकक्कसं ।
 समुप्पेहमसंदिद्धं, गिरं भासिज्ज पन्नवं ॥
- [२९७] एयं च अट्ठमन्नं वा, जं तु नामेइ सासयं ।
 संभासं सच्चमोसं पि, तं पि धीरो विवज्जए ॥
- [२९८] वितहं पि तहामुत्तिं, जं गिरं भासए नरो ।
 तम्हा सो पुट्ठो पावेणं, कि पुण जो मुसं वए ॥
- [२९९] तम्हा गच्छामो वक्खामो, अमुगं वा णे भविस्सइ ।
 अहं वा णं करिस्सामि, एसो वा णं करिस्सइ ॥
- [३००] एवमाइउ जा भासा, एसकालंमि संकिआ ।
 संपयाईयमट्ठे वा, तं पि धीरो विवज्जए ॥
- [३०१] अईयंमि अ कालंमि, पच्चुप्पन्नमनागए ।
 जमट्ठं तु न जाणिज्जा, एवमेयं ति नो वए ॥
- [३०२] अईयंमि य कालंमि, पच्चुप्पन्नमनागए ।
 जत्थ संका भवे तं तु, एवमेयं तु नो वए ॥
- [३०३] अईयम्मि य कालम्मि, पच्चुप्पन्नमनागए ।
 निस्संकियं भवे जं तु, एवमेयं तु निद्धिसे ॥
- [३०४] तहेव फरुसा भासा, गुरुभूओवघाइणी ।
 सच्चा वि सा न वत्तव्वा, जओ पावस्स आगमो ॥
- [३०५] तहेव काणं काणे त्ति, पंडगं पंडगे त्ति वा ।
 वाहिअं वा ऽवि रोगि त्ति, तेणं चोरे त्ति नो वए ॥

- [३०६] एणन्नेण अट्ठेणं, परो जेणुवहम्मइ ।
 आयारभावदोसन्नू, न तं भासिज्ज पन्नवं ॥
- [३०७] तहेव होले गोले त्ति, साणे वा वसुले त्ति य ।
 दमए दुहए वा ऽवि, नेवं भासेज्ज पन्नवं ॥
- [३०८] अज्जिए पज्जिए वाऽवि अम्मो माउस्सिअ त्ति य ।
 पिउस्सिए भाइणेज्ज त्ति, धूए नत्तुणियत्ति य ॥
- [३०९] हले हलेत्ति अन्नोत्ति, भट्ठे सामिणि गोमिणि ।
 होले गोले वसुले त्ति, इत्थियं नेवमालवे ॥

अज्झयणं-७, उद्देशो-

- [३१०] नामधिज्जेण णं बूया, इत्थीगुत्तेण वा पुणो ।
 जहारिहमभिगिज्झ, आलवेज्ज लवेज्ज वा ॥
- [३११] अज्जए पज्जए वाऽवि, बप्पो चुल्लपिउ त्ति य ।
 माउलो भाइणेज्ज त्ति, पुत्ते नत्तुणियत्तिय ॥
- [३१२] हे भो ! हलित्ति अन्नित्ति, भट्ठा सामिय गोमिए ।
 होल गोल वसुलेत्ति, पुरिसं नेवमालवे ॥
- [३१३] नामधेज्जेण णं बूया, पुरिसगुत्तेण वा पुणो ।
 जहारिहमभिगज्झ, आलवेज्ज लवेज्ज वा ॥
- [३१४] पंचिदियाणं पाणाणं, एस इत्थी अयं पुमं ।
 जाव णं न विजाणिज्जा, ताव जाइ त्ति आलवे ॥
- [३१५] तहेव मणुस्सं पसुं, पक्खिं वाऽवि सरीसवं ।
 थूले पमेइले वज्झे, पायमित्ति य नो वए ॥
- [३१६] परिवुड्ढे त्ति णं बूया, बूया उवचिए त्ति य ।
 संजाए पीणिए वा ऽवि, महाकाय त्ति आलवे ॥
- [३१७] तहेव गाओ दुज्झाओ दम्मा गोरहग त्ति य ।
 वाहिमा रहजोगी त्ति, नेवं भासेज्ज पन्नवं ॥
- [३१८] जुवं गवे त्ति णं बूया, धेणुं रसदय त्ति य ।
 रहस्से महल्लए वा ऽवि, वए संवहणे त्ति य ॥
- [३१९] तहेव गंतुमुज्जाणं पव्वयाणि वनानि य ।
 रुक्खा महल्ल पेहाए नेवं भासिज्ज पन्नवं ॥
- [३२०] अलं पासयखंभाणं, तोरणाणं गिहाणि य ।
 फलिह ऽग्गलनावाणं, अलं उदगदोणिणं ॥
- [३२१] पीढए चंगबेरे य, नंगले मइयं सिया ।
 जंतलढ्ढी व नाभी वा, गंडिआ व अलं सिया ॥
- [३२२] आसनं सयनं जाणं, हुज्जा वा किंचुवस्सए ।
 भूओवघाइणिं भासं, नेवं भासेज्ज पन्नवं ॥

- [३२३] तहेव गंतुमुज्जाणं, पव्वयाणि वनानि य ।
 रुक्खा महल्ल पेहाए, एवं भासिज्ज पन्नवं ॥
- [३२४] जाइमंता इमे रुक्खा, दीहवट्टा महालया ।
 पयायसाला विडिमा, वए दरिसणि त्ति य ॥
- [३२५] तहा फलाइं पक्काइं, पायखज्जाइं नो वए ।
 वेलोइयाइं टालाइं, वेहिमाइ त्ति नो वए ॥
- [३२६] असंथडा इमे अंबा, बहुनिव्वडिमा फला ।
 वइज्ज बहुसंभूआ, भूअरूव त्ति वा पुणो ॥

अज्झयणं-७, उद्देशो-

- [३२७] तहेवोसहीओ पक्काओ, नीसिआओ छवीइ य ।
 लाइमा भज्जिमाउ त्ति, पिहुखज्ज त्ति नो वए ॥
- [३२८] रूढा बहुसंभूया, थिरा ऊसढा वि य ।
 गब्भियाओ पसूयाओ, संसाराउ त्ति आलवे ॥
- [३२९] तहेव संखडिं नच्चा, किच्चं कज्जं त्ति नो वए ।
 तेनगं वा ऽवि वज्झि त्ति, सुत्तिथि त्ति अ आवगा ॥
- [३३०] संखडिं संखडिं बूया, पणियट्ठत्ति तेणगं ।
 बहुसमाणि तित्थाणि आवगाणं वियागरे ॥
- [३३१] तहा नईओ पुण्णाओ, कायत्तिज्ज त्ति नो वए ।
 नावाहिं तारिमाउ त्ति, पाणिपिज्ज त्ति नो वए ॥
- [३३२] बहुवाहडा अगाहा, बहुसलिलुप्पिलोदगा ।
 बहुवित्थडोदगा आवि, एवं भासेज्ज पन्नवं ॥
- [३३३] तहेव सावज्जं जोगं, परस्सट्ठा अ निट्ठियं ।
 कीरमाणं ति वा नच्चा, सावज्जं न लवे मुनी ॥
- [३३४] सुकडे त्ति, सुपक्के त्ति, सुच्छिन्ने सुहडे मडे ।
 सुनिट्ठिए सुलट्ठेत्ति, सावज्जं वज्जए मुनी ॥
- [३३५] पयत्तपक्कत्ति व पक्कमालवे, पयत्ताछिन्नत्ति व छिन्नमालवे
 ।
 पयत्तलट्ठित्ति व कम्महेउयं, पहारगाढित्ति व गाढमालवे ॥
- [३३६] सव्वुक्कसं परग्घं वा, अउलं नत्थि एरिसं ।
 अविक्कियमवत्तत्वं, अचियतं चेव नो वए ॥
- [३३७] सव्वमेयं वइस्सामि, सव्वमेयं ति नो वए ।
 अणुवीइ सव्वं सव्वत्थ, एवं भासेज्ज पन्नवं ॥
- [३३८] सुक्कीयं वा सुविक्कीयं, अकिज्जं किज्जमेव वा ।
 इमं गिण्ह इमं मुंच, पणियं नो वियागरे ॥
- [३३९] अप्पग्घे वा महग्घे वा, कए वा विक्कए वि वा ।

पणियद्वे समुप्पन्ने, अणवज्जं वियागरे ॥

[३४०] तहेवासंजयं धीरो, आस एहि करेहि वा ।

सय चिद्ध वयाहित्ति, नेवं भासेज्ज पन्नवं ॥

[३४१] बहवे इमे असाहु, लोए वुच्चंति साहुणो ।

न लवे असाहुं साहुत्ति साहुं साहुत्ति आलवे ॥

[३४२] नाणदंसणसंपन्नं, संजमे य तवे रयं ।

एवं गुणसमाउत्तं, संजयं साहुमालवे ॥

[३४३] देवाणं मनुयाणं च, तिरिआणं च वुग्गहे ।

अमुयाणं जओ होउ, मा वा होउत्ति नो वए ॥

अज्झयणं-७, उद्देशो-

[३४४] वाओ वुद्धं व सीउण्हं, खेमं घायं सिवे ति वा ।

कया णु होज्ज एयाणि, मा वा होउ त्ति नो वए ॥

[३४५] तहेव मेहं व नहं व माणवं, न देवदेव त्ति गिरं वएज्जा ।

समुच्छिण उन्नए वा पओए, वइज्ज वा वुद्ध बलाहए त्ति ॥

[३४६] अंतलिक्खे त्ति णं बूया, गुज्झाणुचरिय त्ति अ ।

रिद्धिमंतं नरं दिस्स, रिद्धिमंतं ति आलवे ॥

[३४७] तहेव सावज्जणुमोयणी गिरा, ओहारिणी जा य परोवघाइणी ।

से कोह लोह भय हास माणवो, न हासमाणो वि गिरं वएज्जा ॥

[३४८] सुवक्कसुद्धिं समुपेहिया मुनी, गिरं च दुद्धं परिवज्जए सया ।

मिअं अट्ठे अणुवीइ भासए, सयाण मज्झे लहई पसंसणं ॥

[३४९] भासाइ दोसे य गुणे य जाणिया, तीसे अ दुद्धे परिवज्जए सया ।

छसु संजएसामणिए सया जए, वइज्ज बुद्धे हियमाणुलोमियं ॥

[३५०] परिक्खभासी सुसमाहिइंदिए, चउक्कसायावगए अनिस्सिए ।

से निद्धणे धुन्नमलं पुरेकडं, आराहए लोगमिणं तहा परं ॥ त्ति

बेमि

० सत्तमं अज्झयणं समत्तं ०

० अट्ठमं अज्झयणं-आयारपणिही ०

[३५१] आयारपणिहिं लद्धं जहा कायव्व भिक्खुणा ।

तं भे उदाहरिस्सामि, आनुपुत्विं सुणेह मे ॥

[३५२] पुढवि दग अगनि मारुय, तण रुक्ख सबीयगा ।

तसा य पाणा जीव त्ति, इइ वुत्तं महेसिणा ॥

[३५३] तेसिं अच्छणजोएण, निच्चं हीयव्वयं सिया ।

मनसा कयवक्केणं, एवं हवइ संजए ॥

[३५४] पुढविं भित्तिं सिलं लेलुं, नेव भिंदे न संलिहे ।

तिविहेणं करणजोएणं, संजए सुसमाहिए ॥

[३५५] सुद्धपुढवीए न निसीए, ससरक्खंमि य आसने ।

- पमज्जित्तु निसीएज्जा, जाइत्ता जस्स ओग्गहं ॥
 [३५६] सीओदगं न सेविज्जा, सिलावुडं हिमाणि य ।
 उसिणोदगं तत्तफासुयं, पडिगाहिज्ज संजए ॥
 [३५७] उदउल्लं अप्पणो कायं, नेव पुंछे न संलिहे ।
 समुप्पेह तहाभूयं, नो णं संघट्टए मुनी ॥
 [३५८] इंगालं अगनिं अच्चिं, अलायं वा सजोइयं ।
 न उंजेज्जा न घट्टेज्जा, नो णं निव्वावए मुनी ॥
 [३५९] तालियंटेण पत्तेण, साहाए विहुयणेण वा ।
 न वीएज्ज अप्पणो कायं, बाहिरं वा ऽवि पोग्गलं ॥

अज्झयणं-८, उद्देसो-

- [३६०] तणरुक्खं न छिंदेज्जा, फलं मूलं च कस्सइ ।
 आमगं विविहं बीअं, मनसा वि न पत्थए ॥
 [३६१] गहणेसु न चिट्ठेज्जा, बीएसु हरिएसु वा ।
 उदगंमि तहा निच्चं, उत्तिंगपणगेसु वा ॥
 [३६२] तसे पाणे न हिंसेज्जा, वाया अदुव कम्ममुणा ।
 उवरओ सव्वभूएसु, पासेज्ज विविहं जगं ॥
 [३६३] अट्ठ सुहुमाइं पेहाए, जाइं जाणित्तु संजए ।
 दयाहिगारी भूएसु, आस चिट्ठ सएहि वा ॥
 [३६४] कयराइं अट्ठ सुहुमाइं ? जाइं पुच्छिज्ज संजए ।
 इमाइं ताइं मेहावी, आक्खेज्ज वियक्खणो ॥
 [३६५] सिणेहं पुप्फसुहुमं च, पाणुत्तिंगं तहेव य ।
 पणगं बीय हरियं च, अंडसुहुमं च अट्ठमं ॥
 [३६६] एवमेयाणि जाणिज्जा, सव्वभावेण संजए ।
 अप्पमत्तो जए निच्चं, सव्विंदिय समाहिए ॥
 [३६७] धुवं च पडिलेहेज्जा, जोगसा पायकंबलं ।
 सिज्जमुच्चारभूमिं च, संथारं अदुवा ऽससंनं ॥
 [३६८] उच्चारं पासवणं, खेलं सिंधाणजल्लियं ।
 फासुअं पडिलेहित्ता, परिट्ठावेज्ज संजए ॥
 [३६९] पविसित्तु परागारं, पाणट्ठा भोयणस्स वा ।
 जयं चिट्ठे मियं भासे, न य रुवेसु मणं करे ॥
 [३७०] बहु सुणेइ कण्णेहिं, बहुं अच्छीहिं पिच्छइ ।
 न य दिट्ठं सुयं सव्वं, भिक्खू अक्खाउमरिहइ ॥
 [३७१] सुअं वा जइ वा दिट्ठं, न लवेज्जोवघाइयं ।
 न य केणइ उवाएणं गिहिजोगं समायरे ॥
 [३७२] निट्ठाणं रसनिज्जूदं, भद्दगं पावगं ति वा ।

पुट्टो वा ऽवि अपुट्टो वा, लाभालाभं न निदिसे ॥

[३७३] न य भोयणंमि गिद्धो, चरे उच्छं अयंपिरो ।

अफासुअं न भुंजेज्जा, कीअमुद्देसियाहडं ॥

[३७४] सन्निहिं च न कुव्वेज्जा, अणुमायं पि संजए ।

मुहाजीवी असंबद्धे, हवेज्ज जगनिस्सिए ॥

[३७५] लूहवित्ती सुसंतुट्ठे, अप्पिच्छे सुभरे सिया ।

आसुरत्तं न गच्छेज्जा, सोच्चा णं जिनसासनं ॥

[३७६] कण्णसुक्खेहिं सद्धेहिं, पेमं नाभिनिवेसए ।

दारुणं कक्कसं फासं, काएण अहियासए ॥

अज्झयणं-८, उद्देसो-

[३७७] खुहं पिवासं दुस्सेज्जं, सीउण्हं अरइं भयं ।

अहियासे अव्वहिओ, देहदुःक्खं महाफलं ॥

[३७८] अत्थं गयंमि आइच्चे, पुरत्था य अनुग्गए ।

आहारमाइअं सव्वं, मनसा वि न पत्थए ॥

[३७९] अतिंतिणे अचवले, अप्पभासी मियासणे ।

हविज्ज उयरे दंते, थोवं लद्धुं न खिंसए ॥

[३८०] न बाहिरं परिभवे, अत्ताणं न समुक्कसे ।

सुयलाभे न भज्जेज्जा, जच्चो तवस्सि बुद्धिए ॥

[३८१] से जाणमजाणं वा, कट्ठु आहम्मियं पयं ।

संवरे खिप्पमप्पाणं, बीयं तं न समायरे ॥

[३८२] अनायारं परक्कम्म, नेव गूहे न निण्हवे ।

सूर्इ सया वियडभावे, असंसत्ते जिइंदिए ॥

[३८३] अमोहं वयणं कुज्जा, आयरियस्स महप्पणो ।

तं परिगिज्झ वायाए, कम्मणा उववायए ॥

[३८४] अधुवं जीवियं नच्चा, सिद्धिमग्गं वियाणिआ ।

विणिअट्ठेज्जा भोगेसु, आउं परिमियमप्पणो ॥

[३८५] बलं थामं च पेहाए, सद्धामारुग्गमप्पणो ।

खित्तं कालं च विन्नाय, तह ऽप्पाणं निजुंजए ॥

[३८६] जरा जाव न पीडेइ, वाही जाव न वड्ढइ ।

जाविंदिया न हायंति, ताव धम्मं समायरे ॥

[३८७] कोहं मानं च मायं च, लोभं च पापवड्ढणं ।

वमे चत्तारि दीसे उ, इच्छंतो हियमप्पणो ॥

[३८८] कोहो पीइं पणासेइ, मानो विनयनासणो ।

माया मित्ताणि नासेइ, लोहो सव्वविनासणो ॥

[३८९] उवसमेण हणे कोहं, मानं मद्वया जिणे ।

मायं च ऽज्जवभावेण, लोभं संतोसओ जिणे ॥

[३९०] कोहो य माणो य अनिग्गहीया, माया य लोभो य पवड्ढमाणा ।

चत्तारि एए कसिणा कसाया, सिंचंति मूलाइं पुनब्भवस्स ॥

[३९१] रायाणिएसु विनयं पउंजे, धुवसीलयं सययं न हावएज्जा ।

कुम्मोव्व अल्लीणपलीणगुत्तो, परक्कमेज्जा तवसंजमम्मि ॥

[३९२] निदं च न बहु मन्नेज्जा, संप्पहासं विवज्जए ।

मिहो कहाहिं न रमे, सज्झायंमि रओ सया ॥

[३९३] जोगं च समणधम्मंमि, जुंसे अनलसो धुवं ।

जुत्तो अ समणधम्मंमि, अदं लहइ अनुत्तरं ॥

अज्झयणं-८, उद्देशो-

[३९४] इहलोगपारत्तहियं, जेणं गच्छइ सुग्गइं ।

बहुस्सुयं पज्जुवासेज्जा, पुच्छिज्ज ऽत्थविनिच्छयं ॥

[३९५] हत्थं पायं च कायं च, पणिहाय जिइंदिए ।

अल्लीणगुत्तो निसिए, सगासे गुरुणो मुनी ॥

[३९६] न पक्खओ न पुरओ, नेव किच्चाण पिट्ठओ ।

न य ऊरुं समासेज्ज, चिद्धिज्जा गुरुणंतिए ॥

[३९७] अपुच्छिओ न भासिज्जा, भासमाणस्स अंतरा ।

पिट्ठिमंसं न खाइज्जा, मायमोसं विवज्जए ॥

[३९८] अप्पत्तियं जेण सिआ, आसु कुप्पिज्ज वा परो ।

सव्वसो तं न भासिज्जा, भासं अहियगामिणिं ॥

[३९९] दिदं मियं असंदिदं, पडिपुन्नं वियं जियं ।

अयंपिरमणुव्विग्गं, भासं निसिरे अत्तवं ॥

[४००] आयारपन्नत्तिधरं, दिद्धिवायमहिज्जगं ।

वइविक्खलिअं नच्चा, न तं उवहसे मुनी ॥

[४०१] नक्खत्तं सुमिणं जोगं, निमित्तं मंतभेसजं ।

गिहिणो तं न आइक्खे, भूआहिगरणं पयं ॥

[४०२] अन्नदं पगडं लयणं, भइज्ज सयणासणं ।

उच्चारभूमिसंपन्नं, इत्थीपसुविवज्जियं ॥

[४०३] विवित्ता अ भवे सेज्जा, नारीणं न लवे कहं ।

गिहिसंथवं न कुज्जा, कुज्जा साहूहिं संथवं ॥

[४०४] जहा कुक्कुडपोयस्स, निच्चं कुललओ भयं ।

एवं खु बंभयारिस्स, इत्थिविग्गहओ भयं ॥

[४०५] चित्तभित्तिं न निज्झाए, नारिं वा सुअलंकियं ।

भक्खरं पिव ददुणं, दिद्धिं पडिसमाहरे ॥

[४०६] हत्थपाय पडिच्छिन्नं, कण्णनास विगप्पियं ।

- अवि वाससयं नारिं, बंभयारी विवज्जए ॥
 [४०७] विभूसा इत्थिसंसग्गी, पणीयं रसभोयणं ।
 नरस्स ऽत्तगवेसिस्स, विसं तालउडं जहा ॥
 [४०८] अंगपच्चंगसंठाणं, चारुल्लवियपेहियं ।
 इत्थीणं तं न निज्झाए, कामरागविवड्ढणं ॥
 [४०९] विसएसु मणुण्णेषु, पेमं नाभिनिवेसए ।
 अनिच्चं तेसिं विण्णाय, परिणामं पुग्गलाण य ॥
 [४१०] पोग्गलाणं परिणामं, तेसिं नच्चा जहा तहा ।
 विणीयतण्हो विहरे, सीईभूएण अप्पणा ॥

अज्झयणं-८, उद्देसो-

- [४११] जाइ सद्धाइ निक्खंतो, परिआयट्ठाणमुत्तमं ।
 तमेव अनुपालेज्जा, गुणे आयरियसंमए ॥
 [४१२] तवं चिमं संजमजोगयं च, अज्झायजोगं च सया अहिट्ठए ।
 सूरे व सेणाए समत्तमाउहे, अलमप्पणो होइ अलं परेसिं ॥
 [४१३] सज्झायसज्झाणरयस्स ताइणो, अपावभावस्स तवे रयस्स ।
 विसुज्झई जं सि मलं पुरेकडं, समीरिअं रुप्पमलं व जोइणा ॥
 [४१४] से तारिसे दुक्खसहे जिइंदिए, सुएण जुत्ते अममे अकिंचणे ।
 विरायई कम्मघणंमि अवगए, कसिणब्भपुडावगमे व चंदिम ॥ त्तिबेमि

◦ अद्धमं अज्झयणं समत्तं ◦

◦ नवमं अज्झयणं-विनसयसमाही ◦

∴ पढमो उद्देसो ∴

- [४१५] थंभा व कोहा व मयप्पमाया, गुरुस्सगासे विनयं न सिक्खे ।
 सो चेव उ तस्स अभूइभावो, फलं व कीयस्स वहाय होइ ॥
 [४१६] जे यावि मंदि त्ति गुरुं विइत्ता, डहरे इमे अप्पसुए त्ति नच्चा ।
 हीलंति मिच्छं पडिवज्जमाणा, करंति आसायण ते गुरुणं ॥
 [४१७] पगईइ मंदा वि भवंति एगे, डहरा विय जे सुयबुद्धोववेया ।
 आयारमंता गुणसुट्ठिअप्पा, जे हीलिआ सिहिरिव भास कुज्जा ॥
 [४१८] जे यावि नागं डहरं ति नच्चा, आसायए स अहियाय होइ ।
 एवायरियं पि हु हीलयंतो, नियच्छई जाइपहं खु मंदो ॥
 [४१९] आसीविसो वाऽवि परं सुरुट्ठो, किं जीवनासाउ परं नु कुज्जा ? ।
 आयरियपाया पुण अप्पसन्ना, अबोहिआसायण नत्थि मुखो ॥
 [४२०] जो पावगं जलियमवक्कमिज्जा, आसीविसं वा वि हु कोवएज्जा ।
 जो वा विसं खायइ जीवियट्ठी, एसोवमा ऽसायणया गुरुणं ॥
 [४२१] सिया हु से पावए नो डहेज्जा, आसीविसो वा कुविओ न भक्खे ।

सिया विसं हालहलं न मारे, न यावि मुखो गुरुहीलणाए ॥

[४२२] जो पव्वयं सिरसा भेत्तुमिच्छे, सत्तं व सीहं पडिबोहएज्जा ।

जो वा दए सत्तिअग्गे पहारं, एसोवमा ssसायणया गुरुणं ॥

[४२३] सिया हु सीसेणं गिरिं पि भिंदे, सिआ हु सीहो कुविओ न मक्खे ।

सिया 1न भिंदेज्ज व सत्तिअग्गं, न यावि मुखो गुरुहीलणाए ॥

[४२४] आयरिअपाया पुण अप्पसन्ना, अबोहिआसायण नत्थि मुखो ।

तम्हा अनाबाहसुहाभिकंखी, गुरुप्पसायाभिमुहो रमेज्जा ॥

[४२५] जहा ssहियग्गी जलणं नमंसे, नाणाहुईमंतपयाभिसित्तं ।

एवायरिअं उवचिद्वएज्जा, अनंतनाणोवगओ वि संतो ॥

अज्झयणं-९, उद्देसो-१

[४२६] जस्संतिए धम्मपयाइ सिक्खे, तस्संतिए वेणइयं पउंजे ।

सक्कारए सिरसा पंजलीओ, कायग्गिरा भो मनसा य निच्चं ॥

[४२७] लज्जा दया संजम बंभचेरं, कल्लाणभागिस्स विसोहिठाणं ।

जे मे गुरु सययमनुसासयंति, ते sहं गुरु सययं पूययामि ॥

[४२८] जहा निसंते तवनच्चिमाली, पभासई केवलं भारहं तु ।

एवायरिओ सुअसीलबुद्धिए, विरायई सुरमज्झे व इंदो ॥

[४२९] जहा ससी कोमुइजोगजुत्तो, नक्खत्ततारागण परिवुडप्पा ।

खे सोहई विमले अब्भमुक्के, एवं गणी सोहइ भिक्खुमज्झे ॥

[४३०] महागार आयरिओ महेसी, समाहिजोगे सुअसीलबुद्धिए ।

संपाविउकामे अनुत्तराइं, आराहए तोसइ धम्मकामी ॥

[४३१] सोच्चा ण मेहावि सुभासियाइं, सुस्सूसए आयरियप्पमत्तो ।

आराहइत्ताण गुणे अनेगे, से पावइ सिद्धिमनुत्तरं- त्तिबेमि ॥

◦ नवमे अज्झयणे पढमो उद्देसो समत्तं ◦

◦ बीओ-उद्देसो ◦

[४३२] मूलाउ खंधप्पभवो दुमस्स, खंधाउ पच्छा समुव्वेति साहा ।

साहप्पसाहाविरुहंति पत्ता, तओ सि पुप्फं च फलं रसो य ॥

[४३३] एवं धम्मस्स विनओ, मूलं परमो से मुखो ।

जेण कित्तिं सुअं सिग्घं, नीसेसं चाभिगच्छइ ॥

[४३४] जे य चंडे मिए थद्धे, दुव्वाई नियडी सढे ।

वुज्झइ से अविणीयप्पा, कट्ठं सोयगयं जहा ॥

[४३५] विनयंपि जो उवाएणं, चोइओ कुप्पइ नरो ।

दिव्वं सो सिरिमेज्जंति, दंडेण पडिसेहए ॥

[४३६] तहेव अविणीयप्पा, उववज्झा हया गया ।

दीसंति दुहमेहंता, आभिओगमुवट्ठिया ॥

[४३७] तहेव सुविणीयप्पा, उववज्झा हया गया ।

दीसंति सुहमेहंता, इड्ढिं पत्ता महायसा ॥
 [४३८] तहेव अविणीयप्पा, लोगंमि नरनारिओ ।
 दीसंति दुहमेहंता, छाया ते विगलिंदिया ॥
 [४३९] दंडसत्थपरिज्जुन्ना, असब्भवयणेहि य ।
 कलुणा विवन्नछंदा, खुप्पिवासपरिग्गया ॥
 [४४०] तहेव सुविणीयप्पा, लोगंसि नरनारिओ ।
 दीसंति सुहमेहंता, इड्ढिं पत्ता महायसा ॥
 [४४१] तहेव अविणीयप्पा, देव जक्खा य गुज्झगा ।
 दीसंति दुहमेहंता, आभिओगमुवड्ढिआ ॥

अज्झयणं-९, उद्देसो-२

[४४२] तहेव सुविणीयप्पा, देवा जक्खा य गुज्झगा ।
 दीसंति सुहमेहंता, इड्ढिं पत्ता महायसा ॥
 [४४३] जे आयरियउवज्झायाणं, सुस्सूसा वयणंकरा ।
 तेसिं सिक्खा पवढंति, जलसित्ता इव पायवा ॥
 [४४४] अप्पणद्धा परद्धा वा, सिप्पा नेउणियाणि य ।
 गिहिणो उवभोगद्धा, इहलोगस्स कारणा ॥
 [४४५] जेण बंधं वहं घोरं, परियावं च दारुणं ।
 सिक्खमाणा नियच्छंति, जुत्ता ते ललिइंदिया ॥
 [४४६] तेऽवि तं गुरुं पूयंति तस्स सिप्पस्स कारणा ।
 सक्कारंति नमंसंति, तुद्धा निद्देसवत्तिणो ॥
 [४४७] किं पुण जे सुयग्गाही, अनंतहियकामए ।
 आयरिआ जं वए भिक्खू, तम्हा तं नाइवत्तए ॥
 [४४८] नीयं सेज्जं गइं ठाणं नीयं च आसनानि य ।
 नीयं च पाए वंदेज्जा नीयं कुज्जा य अंजलिं ॥
 [४४९] संघट्टइत्ता काएणं, तहा उवहिणामवि ।
 खमेह अवराहं मे, वइज्ज न पुणो त्ति य ॥
 [४५०] दुग्गओ वा पओएणं, चोइओ वहइ रहं ।
 एवं दुबुद्धि किच्चाणं, वुत्तो वुत्तो पकुव्वइ ॥
 [४५१] आलवंते लवंते वा, न निसिज्जाए पडिस्सुणे ।
 नत्तूणं आसनं धीरो, सुस्सूसाए पडिस्सुणे ॥
 [४५२] कालं छंदोवयारं च, पडिलेहित्ताण हेउहिं ।
 तेण तेण उवाएण, तं तं संपडिवायए ॥
 [४५३] विवत्ती अविनीयस्स, संपत्ती विनियस्स य ।
 जस्सेयं दुहओ नायं, सिक्खं से अभिगच्छइ ॥
 [४५४] जे यावि चंडे मइइड्ढिगारवे, पिसुणे नरे साहसहीणपेसणे ।

अदिद्धधम्मे विनए अकोविए, असंविभागी न हु तस्स मुखो ॥

[४५५] निद्वेसवत्ती पुण जे गुरुणं, सुअत्थधम्मा विणयंमि कोविया ।

तरित्तु ते ओहमिणं दुरुत्तरं, खवित्तु कम्मं गइमुत्तमं गया ॥ त्तिबेमि

◦ नवमे अज्झयणे बीओ उद्देसो समत्तं ◦

◦ तइओ-उद्देसो ◦

[४५६] आयरियं अग्गिमिवाहियग्गी, सुस्सूसमाणो पडिज्जागरेज्जा ।

आलोइयं इंगियमेव नच्चा, जो छंदमाराहयई स पुज्जो ॥

[४५७] आयारमद्वा विनयं पउंजे, सुस्सूसमाणो परिगिज्झ वक्कं ।

अज्झयणं-९, उद्देसो-३

जहोवइद्वं अभिकंखमाणो, गुरुं तु नासाययई स पुज्जो ॥

[४५८] रायणिएसु विनयं पउंजे, डहराऽवि य जे परिआयजिद्वा ।

नीअत्तणे वट्टइ सच्चवाई, ओवायवं वक्ककरे स पुज्जो ॥

[४५९] अण्णायउंछं चरई विसुद्धं, जवणद्वया समुयाणं च निच्चं ।

अलद्धयं नो परिदेवएज्जा, लद्धुं न विक्कत्थई स पुज्जो ॥

[४६०] संथारसेज्जाऽऽसणभत्तपाने, अपिच्छया अइलाभेऽवि संते ।

जो एवमप्पाणभितीसइज्जा, संतोसपाहन्नरए स पुज्जो ॥

[४६१] सक्का सहेउं आसाए कंटया, अओमया उच्छहया नरेणं ।

अनासए जो उ सहिज्ज कंटए, वईमए कन्नसरे स पुज्जो ॥

[४६२] मुहुत्तदुक्खा हुं हवंति कंटया, अओमया तेऽवि तओ सुउद्धरा ।

वायादुरुत्ताणि दुरुद्धराणि, वेरानुबंधीणि महब्भयाणि ॥

[४६३] समावयंता वयणाभिधाया, कन्नं गया दुम्मणियं जणंति ।

धम्मो त्ति किच्चा परमग्गसूरे, जिइंदिए जो सहई स पुज्जो ॥

[४६४] अवण्णवायं च परम्महुस्स, पच्चक्खओ पडिनीयं च भासं ।

ओहारिणिं अप्पिअकारिणिं च भासं न भासिज्ज सया स पुज्जो ॥

[४६५] अलोलुए अक्कुहए अमाई, अपिसुणे आवि अदीनवित्ती ।

नो भावए नो ऽवि अ भावियप्पा, अकोउहल्ले अ सया स पुज्जो ॥

[४६६] गुणेहिं साहू अगुणेहिऽसाहू, गिण्हाहि साहू गुण मुंचऽसाहू ।

विआणिया अप्पगमप्पएणं, जो रागदोसेहिं समो स पुज्जो ॥

[४६७] तहेव डहरं च महल्लगं वा, इत्थी पुमं पव्वइअं गिहिं वा ।

नो हीलए नो ऽवि य खिंसइज्जा, थंभं च कोहं च चए स पुज्जो ॥

[४६८] जे माणिआ सययं माणयंति, जत्तेण कन्नं व निवेसयंति ।

ते माणए माणरिहे तवस्सी, जिइंदिए सच्चरए स पुज्जो ॥

[४६९] तेसिं गुरुणं गुणसायराणं, सुच्चाण मेहावी सुभासियाइ ।

चरे मुनी पंचरए तिगुत्तो, चउक्कसायावगए स पुज्जो ॥

[४७०] गुरुमिह सययं पडियरिय मुनी, जिनमयनिउणे अभिगमकुसले ।
धुणिय रयमलं पुरेकडं, भासुरमउलं गइं गय त्तिबेमि ॥

• नवमे अज्झयणे तइओ उद्देसो समत्तं •

• चउत्थो-उद्देसो •

[४७१] सुयं मे आउसं तेणं भगवया एवमक्खायं- इह खलु थेरेहिं भगवंतेहिं चत्तारि
विनयसमाहिट्ठाणा पन्नत्ता । कयरे खलु ते थेरेहिं भगवंतेहिं चत्तारि विनयसमाहिट्ठाणा पन्नत्ता ? इमे
खलु ते थेरेहिं भगवंतेहिं चत्तारि विनयसमाहिट्ठाणा पन्नत्ता तं जहा- विनयसमाही सुयसमाही, तवसमाही,
आयारसमाही ।

अज्झयणं-९, उद्देसो-४

[४७२] विनए सुए अ तवे, आयारे निच्च पंडिआ ।

अभिरामयंति अप्पाणं, जे भवंति जिइंदिआ ॥

[४७३] चउत्विहा खलु विनयसमाही भवही, तं जहा- अनुसासिज्जंतो सुस्सूसइ, सम्मं
संपडिवज्जइ, वेयमाराहयइ, न य भवइ अत्तसंपग्गहिए चउत्थं पयं भवइ ।

[४७४] भवइ इत्थ सिलोगो ।

[४७५] पेहेइ हियाणुसासनं सुस्सूसइ तं च पुणो अहिट्ठिए ।

न य माणमएण मज्जई विनयसमाहिआययट्ठिए ॥

[४७६] चउत्विहा खलु सुयसमाही भवइ तं जहा- सुयं मे भविस्सइ त्ति अज्झाइयव्वं भवइ,
एगग्गचित्तो भविस्सामि त्ति अज्झाइयव्वं भवइ, अप्पाणं ठावइस्सामि त्ति अज्झाइयव्वं भवइ, ठिओ परं
ठावइस्सामि त्ति अज्झाइयव्वं भवइ चउत्थं पयं भवइ ।

[४७७] भवइ अ इत्थ सिलोगो ।

[४७८] नाणमेगग्गचित्तो य, ठिओ य ठावइ परं ।

सुयाणि य अहिज्जित्ता, रओ सुयसमाहिए ॥

[४७९] चउत्विहा खलु तवसमाही भवइ, तं जहा- नो इहलोगइयाए तवमहिट्ठेज्जा, नो
पहरलोगइयाए तव महिट्ठेज्जा, नो कित्तिवण्णसद्धसिलोगइयाए तवमहिट्ठिज्जा, नन्नत्थ निज्जरइयाए
तवमहिट्ठिज्जा चउत्थं पयं भवइ ।

[४८०] भवइ अ इत्थ सिलोगो ।

[४८१] विविहगुणतवोरए य निच्चं भवइ निरासए निज्जरट्ठिए ।

तवसा धुणइ पुराणपावगं, जुत्तोसया तवसमाहिए ॥

[४८१] चउत्विहा खलु आयारसमाही भवइ, तं जहा- नो इहलोगइयाए आयारमहिट्ठिज्जा, नो
परलोगइयाए आयारमहिट्ठिज्जा, नो कित्तिवन्नसद्धसिलोगइयाए आयारमहिट्ठिज्जा, नन्नत्थ आरहंतेहिं
हेऊहिं आयारमहिट्ठिज्जा चउत्थं पयं भवइ ।

[भवइ य इत्थ सिलोगो]

[४८२] जिनवयणरए अत्तिंतिणे, पडिपुन्नाययमाययट्ठिए ।

आयारसमाहिसंवुडे, भवइ य दंते भावसंधए ॥

[४८३] अभिगम चउरो समाहिओ, सुविसुद्धो सुसमाहिअप्पओ ।
विउलहियं सुहावहं पुणो, कुव्वइ सो पयखेममप्पणो ॥

[४८४] जाइमरणाओ मुच्चई, इत्थत्थं च चयइ सव्वसो ।
सिद्धे वा हवइ सासए, देवे वा अप्परए महिइडिहिए ॥ त्तिबेमि

◦ नवमे अज्झयणे चउत्थो उद्देसो समत्तं ◦

नवमं अज्झयणं समत्तं ◦

◦ दसमं अज्झयणं-स भिक्खू ◦

[४८५] निक्खम्ममाणाइ य बुद्धवयणे, निच्चं चित्तसमाहिओ हविज्जा ।
इत्थीण वसं न यावि गच्छे, वंतं नो पडियायई जे स भिक्खू ॥

अज्झयणं-१०, उद्देसो-

[४८६] पुढविं न खणे न खणावए, सीओदगं न पिए न पियावए ।
अगनि सत्थं जहा सुनिसियं, तं न जले न जलावए जे स भिक्खू ॥

[४८७] अनिलेण न वीए न वीयावए, हरियाणि न छिंदे न छिंदावए ।
बीयाणि सया विवज्जयंतो, सचित्तं नाहारए जे स भिक्खू ॥

[४८८] वहणं तसथावराणं होइ, पुढवितणकद्धनिस्सियाणं ।
तम्हा उद्देसिअं न भुंजे नो वि पए न पयावए जे स भिक्खू ॥

[४८९] रोइय नायपुत्तवयणे, अत्तसमे मन्नेज्ज छप्पि काए ।
पंच य फासे महव्वयाइं, पंचासवसंवरे जे स भिक्खू ॥

[४९०] चत्तारि वमे सया कसाए, धुवजोगी हवेज्ज बुद्धवयणे ।
अहणे निज्जायरूवरयए, गिहिजोगं परिवज्जए जे स भिक्खू ॥

[४९१] सम्मदिट्ठी सया अमूढे, अत्थि हु नाणे तवे संजमे य ।
तवसा धुणइ पुराणपावगं, मनवयकायसुसंवुडे जे स भिक्खू ॥

[४९२] तहेव असनं पानगं वा, विविहं खाइमं साइमं लभित्ता ।
होही अट्ठो सुए परे वा, तं न निहे न निहावए जे स भिक्खू ॥

[४९३] तहेव असनं पानगं वा, विविहं खाइमं साइमं लभित्ता ।
छंदिअ साहम्मियाण भुंजे, भुच्चा सज्झायरए जे स भिक्खू ॥

[४९४] न य वुग्गहियं कहं कहेज्जा, न य कुप्पे निहुइंदिए पसंते ।
संजमे धुवं जोगेण जुते, उवसंते अविहेडए जे स भिक्खू ॥

[४९५] जो सहइ हु गामकंटए, अक्कोसपहारतज्जणाओ य ।
भयभेरवसद्धसप्पहासे, समसुहदुक्खसहे य जे स भिक्खू ॥

[४९६] पडिमं पडिवज्जिया सुसाणे, नो भीयए भयभेरवाइं दिस्स ।
विविहगुणतवोरए य निच्चं, न सरीरं चाभिकंखई जे स भिक्खू ॥

[४९७] असइं वोसद्धचत्तदेहे, अकुट्ठे व हए व लूसिए वा ।
पुढविसमे मुनी हवेज्जा, अनियाणे अकोउहल्ले जे स भिक्खू ॥

[४९८] अभिभूय काएण परीसहाइं, समुद्धरे जाइपहाउ अप्पयं ।

विइत्तु जाईमरणं महब्भयं, तवे रए सामाणिए जे स भिक्खू ॥

[४९९] हत्थसंजए पायसंजए, वायसंजए संजइंदिए ।

अज्झप्परए सुसमाहियप्पा, सुत्तत्थं च वियाणइ जे स भिक्खू ॥

[५००] उवहिम्मि अमुच्छिए अगिद्धे, अन्नायउंछं पुलनिप्पुलाए ।

कयविककयसन्निहिओ विरए, सव्वसंगावगए य जे स भिक्खू ॥

[५०१] अलोल भिक्खू न रसेसु गिज्झे, उंछं चरे जीविय नाभिकंखे ।

इइंढिं च सक्कारण पूयणं च, चए ठियप्पा अणिहे जे स भिक्खू ॥

[५०२] न परं वएज्जासि अयं कुसीले, जेणं च कुप्पेज्ज न तं वएज्जा ।

जाणिय पत्तेयं पुन्नपावं, अत्ताणं न समुक्कसे जे स भिक्खू ॥

अज्झयणं-१०, उद्देसो-

[५०३] न जाइमत्ते न य रूवमत्ते, न लाभमत्ते न सुएण मत्ते ।

मयाणि सव्वाणि विवज्जइता, धम्मज्झाणरए जे स भिक्खू ॥

[५०४] पवेयए अज्झपयं महामुनी, धम्मे ठिओ ठावयई परंपि ।

निक्खम्म वज्जेज्ज कुसीललिंगं, न यावि हासं कुहए जे स भिक्खू ॥

[५०५] तं देहवासं आसुइं असासयं, सया चए निच्चहियद्वियप्पा ।

छिंदित्तु जाईमरणस्स बंधनं, उवेइ भिक्खू अपुणागमं गइं- ॥ त्तिबेमि

◦ दसमं अज्झयणं समत्तं ◦

◦ पढमा चूलिया रइवक्का ◦

[५०६] इह खलु भो ! पव्वइएणं उप्पन्नदुक्खेणं संजमे अरइसमावण्णिचित्तेणं ओहाणुप्पेहिणा अनोहाइएणं चेव हयरस्सिगयंकुसपोयपडागाभूयाइं इमाइं अट्टारस ठाणाइं सम्मं संपडिलेहियव्वाइं भवंति तं जहा- हं भो ! दुस्समाए दुप्पजीवी, लहुस्सगा इत्तरिआ गिहीणं कामभोगा, भुज्जो य साइबहुला मणुस्सा, इमे य मे दुक्खे न चिरकालोवट्ठाई भविस्सई, ओमजणपुरक्कारे वंतस्स य पडियाइयणं, अहरगइवासोवसंपया,

दुल्लहे खलु भो ! गिहीणं धम्मे गिहिवासमज्झे वसंताण, आयंके से वहाय होइ, संकप्पे से वहाय होइ, सोवक्केसे गिहवासे निरुवक्केसे परिआए, बंधे गिहवासे मुक्खे परियाए, सावज्जे गिहवासे अणवज्जे परियाए, बहुसाहारणा गिहीणं कामभोगा, पत्तेयं पुन्नपावं, अनिच्चे खलु भो ! मणुयाण जीविए कुसग्ग जलबिंदु चंचले, बहुं च खलु पावं कम्मं पगइं, पावाणं च खलु भो ! कडाणं कामाणं पुत्विं दुचिन्नाणं दुप्पडिकंताणं वेइत्ता मुक्खो नत्थि अवेयइत्ता तवसा वा झोसइत्ता, अट्टारसमं पयं भवइ ।

[भवइ य इत्थ सिलोगो]

[५०७] जया य चयई धम्मं, अणज्जो भोगकारणा ।

से तत्थ मुच्छिए बाले, आयइं नावबुज्जई ॥

[५०८] जया ओहाविओ होइ, इंदो वा पडिओ छमं ।

सव्वधम्मपरिब्भट्ठो, स पच्छा परितप्पइ ॥

[५०९] जया अ वंदिमो होइ, पच्छा होइ अवंदिमो ।

देवया व चुया ठाणा, स पच्छा परितप्पइ ॥
 [५१०] जया अ पूइमो होइ, पच्छा होइ अपूइमो ।
 राया व रज्जपब्भट्ठो, स पच्छा परितप्पइ ॥
 [५११] जया य माणिमो होइ, पच्छा होइ अमाणिमो ।
 सेट्ठिव्व कब्बडे छूढो, स पच्छा परितप्पइ ॥
 [५१२] जया अ थेरओ होइ, समइक्कंतजोव्वणो ।
 मच्छोव्व गलं गिलित्ता, स पच्छा परितप्पइ ॥
 [५१३] जया अ कुकुडुंबस्स, कुतत्तीहिं विहम्मइ ।
 हत्थी व बंधने बद्धो, स पच्छा परितप्पइ ॥

चूलिका-१

[५१४] पुत्तदार परिकिण्णो, मोहसंताण संताओ ।
 पंकोसन्नो जहा नागो, स पच्छा परितप्पइ ॥
 [५१५] अज्ज आहं गणी हुंतो, भाविअप्पा बहुस्सुओ ।
 जइ ऽहं रमतो परियाए, सामन्ने जिनदेसिए ॥
 [५१६] देवलोगसमाणो य, परियाओ महेसिणं ।
 रयाणं अरयाणं च, महानरयसारिसो ॥
 [५१७] अमरोवमं जाणिय सुखमुत्तमं, रयाण परियाए तहारयाणं ।
 निरओवमं जाणिय दुक्खमुत्तमं, रमेज्ज तम्हा परियायपंडिए ॥
 [५१८] धम्माउ भट्ठं सिरिओ ववेयं, जन्नग्गि विज्झायमिऽवप्पतेयं ।
 हीलंति णं दुव्विहिअं कुसीला, दाढुद्धियं घोरविसं व नागं ॥
 [५१९] इहेव धम्मो अयसो अकित्ती, दुन्नामधेज्जं च पिहुज्जणंमि ।
 चुयस्स धम्माउ अहम्मसेविणो, संभिन्नवित्तस्स य हेट्ठओ गई ॥
 [५२०] भुंजित्तु भोगाइं पसज्झ चेयसा, तहाविहं कट्ठु असंजमं बहुं ।
 गइं च गच्छे अणहिज्झिअं दुहं, बोही अ से नो सुलहा पुणो पुणो ॥
 [५२१] इमस्स ता नेरइयस्स जंतुणो दुहोवणीयस्स किलेसवत्तिणो ।
 पलिओवमं झिज्जइ सागरोवमं, किसंग पुण मज्झ इम मनोदुहं ॥
 [५२२] न मे चिरं दुक्खमिणं भविस्सइ, असासया भोगपिवास जंतुणो ।
 न मे सरीरेण इमेण ऽविस्सइ, अविस्सई जीवियपज्जवेण मे ॥
 [५२३] जस्सेवमप्पा उ हविज्ज निच्छिओ, चएज्ज देहं न हु धम्मसासनं ।
 तं तारिसं नो पयलेंति इंदिया, उवित्ति वाया व सुदंसणं गिरिं ॥
 [५२४] इच्चेव संपस्सिअ बुद्धिमं नरो, आयं उवायं विविहं वियाणिया ।
 कएण वाया अदु मानसेणं, तिगुत्तिगुत्तो जिणवयणमहिट्ठिज्जासि ॥ त्तिबेमि

• पढमा चूलिया समत्ता •

• बिइया चूलिया विवित्तचरिया •

- [५२५] चूलियं तु पवक्खामि, सुयं केवलिभासियं ।
जं सुणित्तु सुपुण्णाणं, धम्मं उप्पज्जए मई ॥
- [५२६] अणुसोयपट्टिए बहुजणंमि, पडिसोयलद्धलक्खेणं ।
पडिसोयमेव अप्पा, दायव्वो होउकामेणं ॥
- [५२७] अनुसोयसुहो लोओ, पडिसोओ आसवो सुविहियाणं ।
अणुसोओ संसारो, पडिसोओ तस्स उत्तारो ॥
- [५२८] तम्हा आयारपरक्कमेण, संवरसमाहिबहुलेणं ।
चरिया गुणा य नियमा य, हुंति साहूण दट्ठव्वा ॥
- [५२९] अनिएसवासो समुयाणचरिया, अन्नायउंछं पडिरिक्कया य ।

चूलिका-२

- अप्पोवही कलहविवज्जाणा य, विहारचरिया इसिणं पसत्था ॥
- [५३०] आइन्नओमाणविवज्जणा य, ओसन्नदीट्ठाहडभत्तपाने ।
संसट्ठकप्पेण चरेज्ज भिक्खू, तज्जायसंसट्ठ जई जएज्जा ॥
- [५३१] अमज्जमंसासि अमच्छरीया, अभिक्खणं निव्विगइं गया अ ।
अभिक्खणं काउस्सग्गकारी, सज्झायजोगे पयओ हवेज्जा ॥
- [५३२] न पडिन्नविज्जा सयणासणाइं, सेज्जं निसेज्जं तह भत्तपानं ।
गामे कुले वा नगरे व देसे, ममत्तभावं न कहिं पि कुज्जा ॥
- [५३३] गिहिणो वेयावडिअं न कुज्जा, अभिवायणं वंदन पूयणं वा ।
असंकिलिद्वेहिं समं वसेज्जा, मुनी चरित्तस्स जओ न हानी ॥
- [५३४] न या लभेज्जा निउणं सहायं, गुणाहियं वा गुणओ समं वा ।
एक्को वि पावाइं विवज्जयंतो विहरिज्ज कामेसु असज्जमाणो ॥
- [५३५] संवच्छरं वाऽवि परं पमाणं, बीयं च वासं न तहिं वसेज्जा ।
सुत्तस्स मग्गेण चरिज्ज भिक्खू, सुत्तस्स अत्थो जह आणवेइ ॥
- [५३६] जो पुव्वरत्तावरत्तकाले, संपिक्खई अप्पगमप्पएणं ।
किं मे कडं किं च मे किच्चसेसं, किं सक्कणिज्जं न समायरामि ? ॥
- [५३७] किं मे परो पासइ किं च अप्पा, किं वाऽहं खलियं न विवज्जयामि ? ।
इच्चेव सम्मं अनुपासमाणो, अनागयं नो पडिबंध कुज्जा ॥
- [५३८] जत्थेव पासे कइ दुप्पउत्तं, काएण वाया अदु मानसेणं ।
तत्थेव धीरो पडिसाहरेज्जा, आइन्नओ खिप्पमिव क्खलीणं ॥
- [५३९] जस्सेरिसा जोग जिइंदियस्स, धिईमओ सप्पुरिसस्स निच्चं ।
तमाहु लोए पडिबुद्धजीवी, सो जीवई संजमजीविणं ॥
- [५४०] अप्पा खलु सययं रक्खियव्वो, सत्विंदिएहिं सुसमाहिएहिं ।
अरक्खिओ जाइपहं उवेइ, सुरक्खिओ सव्वदुहाण मुच्चइ ॥ त्तिबेमि

मुनि दीपरत्नसागरेण संशोधिताः सम्पादिताश्च “दसवेआलियं मूलसुत्तं” सम्मत्तं

४२

दसवेआलियं तइअं मूलसुत्तं सम्मत्तं